



本國學基  
叢書 孟東野詩集





書叢本基學國

集詩野東孟

撰郊孟



館	央	國
收	圖	立

行發館書印務



孟東野以詩鳴于中唐之間。極爲昌黎韓子所稱重。至如聯句諸作。與韓公角奇爭雋。不肯相下。可謂雄矣。先輩且有東野潤色退之之說。雖未必然。要其所成就。終非翽湜所可班。顧其辭意傷於晦澁。無盛唐大家雄渾醞藉之風。亦器量使之然哉。提學楊按察邃菴先生。以全集不多見。出所抄本。屬商州梓行之。維時同知于君睿奉命惟謹。閱兩月工完。先生欲晟識其後。嗚呼。末學小子。於名家述作。何敢妄贅一言。然先生嘉惠後學。與同知君勤事奉公之美。不可以不白也。於是乎書。弘治己未春正月望日。後學汝南強晟識。





# 孟東野詩集目錄

## 第一卷

樂府上

列女操

長安羈旅行

送遠吟

古離別

靜女吟

山老吟

小隱吟

猛將吟

古怨

楚竹吟

貧女詞

灞上輕薄行

長安道

古薄命妾

古雜怨三首

歸信吟

遊子吟

苦寒吟

傷哉行

湘絃怨

遠愁曲

邊城吟

新平歌

結愛

覆巢行

湘妃怨

巫山高

塘下行

車遙遙

空城雀

羽林行

古別離

黃雀吟

求仙曲

南浦篇

殺氣不在邊

絃歌行

出門行二首

巫山曲

楚怨

臨池曲

征婦怨四首

閑怨

古意

遊俠行

有所思

嬋娟篇

清東曲

第二卷

樂府下

織婦辭

折楊柳二首

古怨別

樂府三首

勸善吟

寒江吟

感興上

審交

百憂

衰松

退居

隱士

春日有感

傷時

偶作

古意

塞上吟

古別曲

附陸長源答

望夫石

怨別

路病

遣興

臥病

獨愁

將見故人

寓言

勸學

贈農人

罪松

感懷八首

暮秋感思二首

勸友

陸長源答附

第三卷

感興下

亂離

去婦

聞砧

自歎

投所知

感懷

結交

長安早春

感興

達士

古興

夷門雪贈主人

堯歌二首

勸酒

君子勿鬱鬱二首

遊子

求友

病客吟

離思

傷春

擇友

惜苦

出東門

訪疾

冬日

偷詩

自惜

詠懷上

湖州取解述情

詠懷

秋夕貧居述懷

再下第

失意寄劉侍御

歎命

商州客舍

夜憂

寒地百姓吟

教坊歌兒

酒德

飢雪吟

晚雪吟

老恨

落第

病起言懷

夜感自遣

下第東歸

下第東南行

遠遊

長安旅情

長安旅情

長安羈旅

登科後

歸義興莊居

第四卷

詠懷下

秋懷十五首

雪

懊惱

遊適上

遊城南韓氏莊

夜集

遊城南山墅

遊終南山

櫻桃亭春燕

宿李秀才池亭

渭上思歸

初於洛中選

養病呈從叔了雲

靖安寄居

春愁

與友秋宵會話

招文士飲

登華嚴寺樓

遊龍池寺

遊華山雲臺觀

邀花伴

石淙十首

越中山水

和遊琅琊溪

第五卷

遊適下

陪陸中丞公燕

汝州郡齋聽琴

奉招陳侍御

浮石亭

濟源春

遊枋口二首

遊昭城寺

旅次洛城東水亭

居處

北郭貧居

遊韋七別業

皇甫秀才山亭

喜張從事至

同年春燕

遊石龍渦

看花五首

濟源寒食七首

遊枋口柳溪

嵩少

洛橋晚望

題陸鴻漸山舍

題韋承總幽居

惠聚寺僧房

題從叔述靈巖山壁

題花嚴寺書牕

藍溪元居士草堂

新卜青羅幽居

附陸長源答

題藏書洞

生生亭

寒溪九首

立德新居十首

第六卷

行役

西上經靈寶觀

泛黃河

宿峽陵寄李侍御

鴉路溪行

獨宿峴首

謁復州盧使君

夢澤行

京山行

旅次湘沅懷靈均

過彭澤

過分水嶺

分水嶺別從弟寂

連州吟三章

旅行

紀贈

上河陽李大夫

贈蘇州韋使君

上包祭酒

贈文應上人

贈李觀

贈章仇將軍

杼情上叔

贈李明府

贈轉運陸中丞

獻坐主呂侍郎

贈黔府王中丞楚

贈主人

獻襄陽于大夫

大隱詠三首

投贈張端公

上張徐州

贈崔純亮

嚴河南

贈從弟楚客

贈道月上人

贈城郭道士

獻漢南樊尙書

贈萬年陸郎中

古意贈梁肅補闕

上達溪舍人

贈建業契公

贈鄭夫子魴

贈韓郎中愈二首

戲贈無本二首

第七卷

懷寄

寄張籍

舟中喜遇從叔簡

春夜憶蕭子真

寄洛州李大夫

寄崔純亮

寄張籍

憶江南弟

寄陝府鄧給事

寄鄭軍事唐二十五

酬答

答友人

答韓愈李觀別

憶周秀才素上人

懷南岳隱士二首

寄院中諸公

寄盧虔使君

憶韓愈李翱

寄義興小女子

寄澹公

奉寄諫議十六叔

酬友人見寄新文

答晝上人止讒作

答姚怱見寄

答盧虔故園見寄

酬盧殷少府

答盧仝

送別上

送從弟郢東歸

送別崔寅亮

送無懷道士

送盧虔端公

送曉公

送清遠上人

送蕭鍊師

第八卷

送別下

感別送從叔簡

答郭郎中

從弟楚材見贈

酬李侍御

奉答張舍人

送從叔簡赴舉

送柳淳先入關

送溫初

送任齊二秀才

送豆盧策歸別墅

送從叔簡

送玄亮師

送李尊師玄

送鄒儒立少府

送韓愈從軍

送李習之

送從舅端適楚地

送獻上人

送崔爽之湖南

送王鍊師

送黃構

送孟寂赴舉

餞陳明府

送殷秀才

送新羅使

送陸暢

送魏端公入朝

送郭秀才

送從叔校書南歸

送河南裴文學

送人歸山

送盧汀侍御

送獨孤秀才

送超上人歸天台

送岑秀才

送道士

送孫秀才

送柳淳

送青陽上人

送弟郢

送淡公十二首

送盧郎中汀

送鄭僕射

贈姚怱別

與韓愈李翱張籍話別

汴州別韓愈

奉別鄭相公二首

第九卷

詠物

海柳詠

曉鶴

邀人賞薔薇

酬鄭毗躑躅詠

答小榼味

蜘蛛諷

燭蛾

雜題

別妻家

贈盧使君虔別

東齋會別

贈別殷山人

搖柳

和薔薇花歌

石楠樹

品松

井上枸杞架

蚊

和甘露

和題項羽廟

聽琴

喜雨

觀種樹

答友人贈炭

尋言上人

姑蔑城

尋裴處士

憩觀公法堂

潭陽秋霽

右方諸青童君

金母飛空歌

安度明

訪嵩陽道士不遇

借車

憑周況乞茶

讀張碧集

聞夜啼贈劉正元

終南山下作

春後雨

爛柯石

噴玉布

崢嶸嶺

子慶詩

春霖奉贈陳侍御

列仙文

清虛真人

謁智遠禪師

聽說維摩經

喜符郎詩有天縱

上昭成閣

田書不立非夫人

謝李翰再到

第十卷

哀傷

弔國殤

弔元魯山十首

弔李元賓遺字

哀孟雲卿荒居

傷舊遊

逢鄭方回

悼幼子

弔李元賓墳

峽哀十首

弔春梅

哭劉言史

讀經

喜盧仝船歸洛

弔比干墓

哭李觀

悼湯衡評事

哭盧貞國

弔房十五次卿

哭祕書包大監

悼亡

覽崔爽遺文

杏殤九首

哭李丹員外

弔唐殷十首

聯句

有所思聯句

贈劍客李園聯句

讚

讚維摩詰

書

上常州盧使君書

遣興聯句



孟東野詩集卷第一

唐 山南西道節度參謀試大理評事平昌孟

樂府上

列女操

梧桐相待老鴛鴦。會雙死。貞婦貴徇夫。捨生亦如此。波瀾誓不起。妾心井中水。

灞上輕薄行

長安無緩步。況值天景暮。相逢灞澗間。親戚不相顧。自嘆方拙身。忽隨輕薄倫。常恐失所避。化為車轍塵。此中生白髮。疾走亦未歇。一作不得歇

長安羈旅行

十日一理髮。每梳飛旅塵。三旬九過飲。每食唯舊貧。萬物皆及時。獨余不覺春。失名誰肯訪。得意爭相親。直木有恬翼。靜流無躁鱗。始知喧競場。莫處君子身。野策藤竹輕。山蔬薇蕨新。潛歌歸去來。事外風景真。

長安道

胡風激秦樹。賤子風中泣。家家朱門開。得見不可入。長安十二衢。投樹鳥亦急。高閣何人家。笙篴正喧吸。

送遠吟

河水昏復晨。河邊相送頻。離盃有淚飲。別柳無枝春。一笑忽然斂。萬愁俄已新。東波與西日。不惜遠行人。



古薄命妾

不惜十指絃。爲君千萬彈。常恐新聲至。坐使一作故聲曲殘。棄置今日悲。卽是昨日歡。將新變故易。持故

爲新難。青山有蘼蕪。淚葉長不乾。空令後代人。採掇幽思一作思櫝。幽蘭

古離別

松山雲繚繞。萍路水分離。雲去有歸日。水分無合時。春芳役雙眼。春色柔四支。楊柳織別愁。千條萬條絲。

古樂府雜怨三首

億人莫至悲。至悲空自衰。寄人莫翦衣。翦衣未必歸。朝爲雙蒂花。暮爲四散飛。花落却遶樹。遊子不顧期。天桃花清晨。遊女紅粉新。天桃花薄暮。遊女紅粉故。樹有百年花。人無一定顏。花送人老盡。人悲花自閑。貧女鏡不明。寒花日少容。暗蛩有虛織。短線無長縫。浪水不可照。狂夫不可從。浪水多散影。狂夫多異蹤。持此一生薄。空成萬一作恨濃百。

靜女吟

艷女皆妬色。靜女獨檢蹤。任禮恥任糴。嫁德不嫁容。君子易求聘。小人難自從。此志誰與諒。琴絃幽韻重。

歸信吟

淚墨洒爲書。將寄萬里親。書去魂亦去。兀然空一身。

山老吟

不行山下地。唯種山上田。罾斧斫旅松。瓢汲家泉。詎知文字力。莫記日月遷。蟠木爲我身。始得全天年。

遊子吟

慈母手中線。遊子身上衣。臨行密密縫。意恐遲遲歸。誰言寸草心。報得三春暉。

小隱吟

我飲不在醉。我歡長寂然。酌溪四五盞。聽彈兩三絃。鍊性靜棲白。洗情深寄玄。一作塞淵號怒路傍子。貪敗不

貪全。

苦寒吟

天色寒青蒼。北風叫枯桑。厚冰無裂文。短日有冷光。敲石不得火。壯陰正奪陽。調苦竟何言。凍吟成此章。

猛將吟

擬膾樓蘭肉。一作五蓄怒時未揚。秋聲無退聲。夜劍不隱光。虎隊手驅出。豹篇心卷藏。古今皆有言。猛將出

北方。

傷哉行

衆毒蔓貞松。一枝難久榮。豈知黃庭客。仙骨生不成。春色捨芳蕙。秋風遶枯莖。彈琴不成曲。始覺知音傾。館月改舊照。吊賓寫餘情。還舟空江上。波浪送銘旌。

古怨

試妾與君淚。兩處滴池水。看取芙蓉花。今年為誰死。

湘絃怨

昧者理芳草。蒿蘭同一鋤。一作狂盲。鸞怒一作怨。秋林曲直同一枯。嘉木忌深蠹。哲人悲巧誣。靈均入迴流。斬尙為良謨。我願分衆泉。清濁各異渠。我願分衆巢。梟鸞相遠居。此志諒難保。此情竟何如。湘絃少知意。孤響空踟躕。

楚竹吟酬盧虔端公見和湘絃怨

握中有新聲。楚竹人未聞。識音者謂誰。一作清靜。夜吹贈君昔為瀟湘引。曾動瀟湘雲。一叫鳳改聽。再驚鶴失一作出。羣。江花匪秋落。山日當晝曛。衆濁響雜沓。孤清思氛氲。欲知怨有一作者。形。願向明月分。一掬靈均淚。千年湘水文。

遠愁曲

飄飄何所從。遺塚行未逢。東西不見人。哭泣一作泣。向青青松。此地有時盡。此哀無處容。聲翻太白雲。淚洗藍田峯。水涉七八曲。山一作石。登千萬重。願口玄夜月。一作靈。出視白日蹤。

貧女詞寄從叔先輩簡

蠶一作貧女非不勤。今年獨無春。二月冰雪深。死盡萬木身。時令自逆行。造化豈不仁。仰企碧雲仙。高控滄海雲。永別勞苦場。飄飄遊無垠。

邊城吟

西城近日一作水。天俗稟氣候。偏行子獨自渴。口人仍賣泉。燒烽碧雲外。牧馬青坡巔。何處鶻突夢。歸思寄仰一作酒眠。

新平歌送許問

邊柳三四尺。暮春一作莫離別歌。早迴儒士駕。暮飲土番河。誰識匣一作篋中寶。楚雲章句多。

殺氣不在邊

殺氣不在邊。凜然中國秋。道險不在山。平地有摧軸。河南又起兵。清濁俱鎖流。豈唯私容艱。擁滯官行舟。況余隔晨昏。去家成阻脩。忽然兩鬢雪。固是一日愁。獨寢夜難曉。起視星漢浮。涼風蕩天地。日夕聲颼颼。萬物無少色。兆人皆老憂。長策苟未立。丈夫誠可羞。靈響復何事。劍鳴思戮讎。

結愛

心心復心心。結愛務在深。一度欲離一作言別。千迴結衣襟。結妾獨守志。結君早歸意。始知結衣裳。不如結心腸。坐結行亦結。結盡百年月。

絃歌行

驅儼擊鼓吹長笛。瘦鬼染面惟齒白。暗中岑岑拽茅鞭。保足朱禪行戚戚。相顧口聲衝庭燎。桃弧射矢時獨叫。

覆巢行

荒城古木枝多枯。飛禽嗷嗷朝哺鷓。枝傾巢覆鷓墜地。烏鳶下啄更相呼。陽和發生均孕育。鳥獸有情知不足。枝危巢小風雨多。未容長成已先覆。靈枝珍木滿上林。鳳巢阿閣重且深。爾今所託非本地。烏鳶何得同一作爾心知。

出門行二首

長河悠悠去無極。百齡同此可歎息。秋風白露沾人衣。壯心凋落奪顏色。少年出門將訴誰。川無梁兮路無歧。一聞陌上苦寒奏。使我佇立驚且悲。君今得意厭梁肉。豈復念我貧賤時。

海風蕭蕭天雨霜。窮愁獨坐夜何長。驅車舊憶太行險。始知遊子悲故鄉。美人相思隔天闕。長望雲端不可越。手持琅玕欲有贈。愛而不見心斷絕。南山峩峩白石爛。碧海之波浩漫漫。參辰出沒不相待。我欲橫天無羽翰。

湘妃怨 作湘靈祠

南巡竟不返。二妃怨一作悲。逾積萬里喪蛾眉。瀟湘水空碧。冥冥荒山下。古廟收貞魄。喬木深青春。清光滿

一作 蕭。瑤。席。攀。芳。徒。有。薦。靈。意。殊。脉。脉。玉。珮。不。可。親。徘徊。煙。波。夕。

巫山曲

巴江上峽重復重。陽臺碧峭十二峯。荆王獵時逢暮雨。夜臥高丘夢神女。輕紅流煙濕艷姿。行雲飛去明星稀。目極魂斷望不見。猿啼三聲淚滴衣。

巫山高

見盡數萬里。不聞三聲猿。但飛蕭蕭雨。中有亭亭魂。千載楚襄恨。遺文宋玉言。至今晴明天。一作音冥裏雲結深閨門。

楚怨

秋入楚江水。獨照汨羅魂。手把綠荷泣。意愁珠淚翻。九門不可入。一犬吠千門。

塘下行

塘邊日欲斜。年少早還家。徒將白羽扇。調妾木蘭花。不是城頭樹。那棲來去鴉。

臨池曲

池中春蒲葉如帶。紫菱成角蓮子大。羅裙蟬鬢寄迎風。雙雙伯勞飛向東。

車遙遙

路喜到江盡。江上又通舟。舟車兩無阻。何處不得遊。丈夫四方志。女子安下留。郎自別日言。無令生遠愁。

旅鴈忽叫月。斷猿寒啼秋。此夕夢君夢。君在百城樓。寄淚無因波。寄恨無因轉。願爲馭者手。與郎迴馬頭。

征婦怨 四首

良人昨日去。明月又不圓。別時各有淚。零落青樓前。君淚濡羅巾。妾淚滿路塵。羅巾長在手。今得隨妾身。路塵如得風。得上君車輪。

漁陽千里道。近如中門限。中門踰有時。漁陽長在眼。生在綠一作絲羅下。不識漁陽道。良人自戍來。夜夜夢中到。

空城雀

一雀入官倉。所食寧損幾。祗慮往覆頻。官倉終害爾。魚網不在天。烏羅不張水。飲啄要自然。可以空城裏。閑怨

妾恨比斑竹。下盤煩冤根。有筍未出土。中已含淚痕。

羽林行

朔雪寒斷指。朔風勁裂冰。胡中射鵰者。此日猶不能。翩翩羽林兒。錦臂飛蒼鷹。揮鞭快白馬。走出黃河凌。

古意

河邊織女星。河畔牽牛郎。未得渡清淺。相對遙相望。

古別離

欲別牽郎衣。郎今到何處。不恨歸來遲。莫向臨邛去。

遊俠行

壯士性剛決。火中見石裂。殺人不迴頭。輕生如鬻別。豈知眼有淚。肯白頭上髮。平生無恩酬。劍閉一百月。

黃雀吟

黃雀舞承塵。倚恃主人仁。主人忽不仁。買彈彈爾身。何不遠飛去。蓬蒿正繁新。蒿粒無人爭。食之足爲珍。莫覩翻車粟。覩翻罪有因。黃雀不知言。贈之徒慙慙。

有所思

桔槔烽火晝不滅。客路迢迢信難越。古鎮刀攢萬片霜。寒江浪起千堆雪。此時西去定如何。空使南心遠。凄切。

求仙曲

仙教生爲門。仙宗靜爲根。持心若妄求。服食安足論。鏟惑有靈藥。餌真成本源。自當出塵網。馭鳳登崑崙。

嬋娟篇

花嬋娟。泛春泉。竹嬋娟。籠曉烟。妓嬋娟。不長妍。月嬋娟。真可憐。夜半姮娥朝太一。人間本自無靈匹。漢宮承寵不多時。飛鸞婕妤相妬嫉。

南浦篇

南浦桃花亞水紅。水邊柳絮由春風。鳥鳴啾啾煙濛濛。自從遠送對悲翁。此翁已與少年別。唯憶深山深谷中。

清東曲

櫻桃花參差。香雨紅霏霏。□笑競攀折。美人濕羅衣。采采清東曲。明眸豔珪玉。青巾扁上郎。上下看不足。南陽公首詞。編入新樂錄。



# 孟東野詩集卷第二

## 樂府下

### 織女辭

夫是田中郎。妾是田中女。當年嫁得君。爲君秉機杼。筋力日已疲。不息窓下機。如何織紈素。自着藍縷衣。官家榜村路。更索栽桑樹。

### 古意

蕩子守邊戍。佳人莫相從。去來年月多。苦愁改形容。上山復下山。踏草成古蹤。徒言採薜蘿。十度不一逢。鑿獨是明月。識志唯寒松。井桃始開花。一見悲萬重。人顏不再春。桃色有再濃。指氣入空房。無慘乍從容。啓貼理針線。非獨學裁縫。手持未染綵。繡爲白芙蓉。芙蓉無染污。將以表心素。欲寄未歸人。當春無信去。無信反增愁。愁心緣隴頭。願君如隴水。冰鏡□□□。宛宛青絲紀。纖纖白玉鈎。玉鈎不虧缺。青絲無斷絕。迴還勝雙手。解盡心中結。

### 折楊柳二首

楊柳多短枝。短枝多別離。贈遠累攀折。柔條安得垂。青春有定節。離別無定時。但恐人別促。不怨來遲遲。莫言短枝條。中有長相思。朱顏與綠楊。併在別離期。

樓上春風過。風前楊柳歌。枝疎緣別苦。曲怨爲年多。花驚燕地雲。葉映楚池波。誰堪別離此。征戍在交河。

和丁助教塞上吟

哭雪復吟雪。廣文丁夫子。江南萬里寒。曾未及如此。整頓氣候誰。言從生靈始。無令惻隱者。哀哀不能已。

古怨別

颯颯秋風生。愁人怨離別。含情兩相向。欲語氣先咽。心曲千萬端。悲來却難說。別後唯所思。天涯共明月。

古別曲

山川古今路。縱橫無斷絕。來往天地間。人皆有離別。行衣未束帶。中腸已先結。不用看鏡中。自知生白髮。欲陳去留意。聲向言前咽。愁結填心胷。茫茫若爲說。荒郊煙莽蒼。曠野風淒切。處處得相隨。人那不如月。

樂府戲贈陸大夫十二丈三首

蓮子不可得。荷花生水中。猶勝道傍柳。無事一作時蕩春風。

淥萍與荷葉。同此一水中。風吹荷葉在。淥萍西復東。

蓮葉未開時。苦心終日卷。春水一作風徒蕩漾。荷花未開展。

戲答

芙蓉初出水。菡萏露中花。風吹着枯木。無奈值空槎。

勸善吟 醉會中贈郭行餘

瘦郭有志氣。相衰老龍鍾。勸我少吟詩。俗窄難爾容。一口百味別。況在醉會中。四座正當喧。片言何由通。顧余味時調。居止多疎慵。見書眼始開。聞樂耳不聰。視聽互相隔。一身且莫同。天疾難自醫。詩僻將何攻。見君如見書。語善千萬重。自悲咄咄感。變作煩惱翁。煩惱不可欺。一作不可欺古劍古劍澀亦雄。知君方少年。少年懷古風。藏書拄屋脊。不借與凡聾。我願拜少年。師之學崇崇。從他笑爲矯。矯善亦可宗。

### 望夫石

望夫石。夫不來兮江水碧。行人悠悠朝與暮。千年萬年色如故。

### 寒江吟

冬至日光白。始知陰氣凝。寒江波浪凍。一作急千里無平冰。飛鳥絕高羽。一作樹行人皆晏興。荻洲素浩渺。碕岸澌磔礧。烟舟忽自阻。風帆不相乘。何況異形體。信任爲股肱。涉江莫涉凌。得意須得朋。結交非賢良。誰免生愛憎。凍水有再浪。失飛有載騰。一言縱醜詞。萬響無善應。取鑒諒不遠。江水千萬層。何當春風吹。利涉吾道弘。

### 感興上

#### 審友

種樹須擇地。惡土變水根。結交若失人。中道生謗言。君子芳桂性。春榮冬更繁。一作春濃寒更繁小人槿花心。朝在

夕不存。莫躡冬冰堅。中有潛浪翻。唯當金石交。可以賢達論。

怨別

一別一迴老。志士白髮早。在富易為容。居貧難自好。沉憂損性靈。服藥亦枯槁。秋風遊子衣。落日行遠道。君問去何之。賤身難一作寧自保。

百憂

萱草女兒花。不解壯士憂。壯士心是劍。為君射斗牛。朝思除國讎。一作難暮思除國讎。計盡山河畫。意窮草木籌。智士日千慮。愚夫唯四愁。何必在波濤。然後驚一作生沉浮。伯倫心不醉。四皓迹難留。出處各有時。衆

議徒啾啾。

路病

病客無主人。艱哉求臥難。飛光赤道路。內火焦肺肝。欲飲井泉竭。欲醫囊用單。稚顏能幾日。壯志忽已殘。人子不言苦。歸書但云一作言安。愁環在我腸。宛轉終無端。

衰松

近世交道衰。青松落顏色。人心忌孤直。木性隨改易。既摧栖日榦。未展擎天力。終是君子材。還思君子識。

遣興

絃貞五條音一作五音詞松直百尺心貞絃含古風直松凌高岑浮聲與狂葩胡爲欲相侵

退居一作退老

退身何所食敗力不能閑種稻耕白水負薪斫青山衆聽喜巴唱獨醒愁楚顏日暮靜歸時幽幽扣松關

臥病

貧病誠可羞故床無新裘一作貧病對客羞數整藍縷裘春色燒肌膚時殮苦咽喉倦寢意蒙昧強言聲幽柔承顏自俛仰

有淚不敢流默默寸心中朝愁續暮愁

隱士

本末一相返漂浮不還真山野多餒士市井無飢人虎豹忌當道麋鹿知藏身奈何貪競者日與患害親顏兒歲歲改利心朝朝新孰知富生禍取富不取貧寶玉忌出璞出璞先爲塵松栢忌出山出山先爲薪君子隱石壁道書爲我鄰寢興思其義澹泊味始真陶公自放歸尙平去有依草木擇地生禽鳥順性飛青青與冥冥所保各不違

獨愁一作獨怨

前日遠別離昨日生白髮欲知萬里情曉臥半床月常恐百蠱鳴使我芳草歇

春日有感

雨滴草芽出一日長一日風吹柳線垂一枝連一枝獨有愁人顏經春如等閑且持酒滿盃狂歌狂笑來

將見故人

佳人季夏中。及此百餘日。無日不相思。明鏡改形質。寧知仲冬時。忽有相逢期。振衣起躑躅。頰鯉躍天池。

傷時

常聞貧賤士之常。草木富者莫相笑。男兒得路卽榮名。邂逅失途成不調。古人結交而重義。今人結交而重利。勸人一種種。桃李種亦直。須遍天地。一生不愛囑人事。囑卽直。須爲生死。我亦不羨季倫富。我亦不笑原憲貧。有財有勢卽相識。無財無勢同路人。因知世事皆一作只如此。却向東溪臥白雲。

寓言

誰言碧山曲。不廢青松直。誰言濁水泥。不污明月色。我有松月心。俗騁風霜力。貞明旣如此。摧折安可得。

偶作

利劍不可近。美人不可親。利劍近傷手。美人近傷身。道險不在廣。十步能摧輪。情憂不在多。一夕能傷神。

勸學

擊石乃有火。不擊元無煙。人學始知道。不學非自然。萬事須已運。他得非我賢。青春須早爲。豈能長少年。

贈農人

勸爾勤耕田。盈爾倉中粟。勸爾伐桑株。減爾身上服。清霜一委地。萬草色不綠。狂飈一入林。萬葉不着木。青春如不耕。何以自結束。

長安早春

旭日朱樓光。東風不驚塵。公子醉未起。美人爭探春。探春不爲桑。探春不爲麥。日日出西園。祗望花柳色。乃知田家春。不入五侯宅。

罪松

雖爲青松姿。霜風何所宜。二月天下樹。綠於青松枝。勿謂賢者喻。勿謂愚者規。伊呂代封爵。夷齊終身飢。彼曲旣在斯。我正實在茲。涇流合渭流。清濁各自持。天令設四時。榮衰有常期。榮合隨時榮。衰合隨時衰。天令旣不從。甚不敬天時。松乃不臣木。青青獨何爲。

感興

拔心草不死。去根柳亦榮。獨有失意人。恍然無力行。昔爲連理枝。今爲斷絃聲。連理時所重。斷絃今所輕。吾欲進孤舟。三峽水不平。吾欲載車馬。太行路崢嶸。萬物根一氣。如何互相傾。

感懷八首

秋氣悲萬物。驚風振長道。登高有所思。寒雨傷百草。平生有親愛。零落不相保。五情今已傷。安得自能老。晨登洛陽坂。目極天茫茫。羣物歸大化。六龍頽西荒。豺狼日已多。草木日已霜。飢年無遺粟。衆鳥去空場。路傍誰家子。白首離故鄉。含酸望松柏。仰面訴穹蒼。去去勿復道。苦飢形兒傷。徘徊不能寐。耿耿含酸辛。中夜登高樓。憶我舊星辰。四時互遷移。萬物何時春。唯憶首陽路。永謝當時人。

長安嘉麗地。宮月生蛾眉。陰氣凝萬里。坐看芳草衰。玉堂有玄鳥。亦以從此辭。傷哉志士嘆。故國多遲遲。深宮豈無樂。擾擾復何爲。朝見名與利。暮還生是非。一作是與非姜牙佐周武。世業永巍巍。舉才天道親。首陽誰採薇。去去荒澤遠。落日當西歸。羲和駐其輪。四海借餘暉。極目何蕭索。驚風正離披。鳩鴉鳴高樹。衆鳥相因依。東方有一士。歲暮常苦飢。主人數相問。脉脉今何爲。貧賤亦有樂。且願掩一作守柴扉。

火雲流素月。三五何明明。光曜侵白日。賢愚迷至精。四時更變化。天道有虧盈。常恐今日沒。須臾還復生。河梁暮相遇。草草不復言。漢家正離亂。王粲別荆蠻。野澤何蕭條。悲風振空山。舉頭是星辰。念我何時還。親愛久別散。形神各離遷。未爲死生訣。長在心目間。有鳥東西來。哀鳴過我前。願飛浮雲外。飲啄見青天。

達士

四時如逝水。百川皆東波。青春去不還。一作迴白髮鑷更多。達人識元氣。一作化變愁爲高歌。傾顏取一醉。富者奈貧何。君看土中宅。富貴一作已矣無偏頗。

暮秋感思二首

西風吹垂楊。條條脆如藕。上有噪日蟬。催人成皓首。亦恐旅步難。何獨朱顏醜。一作朽欲慰一時心。莫如千

日酒。

優哉遵渚鴻。自得養身旨。不啄太倉粟。不飲方塘水。振羽擾浮雲。置羅任徒爾。

古興

楚血未乾衣。荆虹尙埋輝。痛玉不痛身。抱璞求所歸。

勸友

至白涅不緇。至交淡不疑。人生靜躁殊。莫獸相箴規。膠漆武可接。金蘭文可思。堪嗟無心人。不如松柏枝。  
一作青  
松姿。

夷門雪贈主人

夷門貧士空吟雪。夷門豪士皆飲酒。酒聲歡閑入雪銷。雪聲激切悲枯朽。悲歡不同歸去來。萬里春風動江柳。

答

陸長源

好丹與素通不同。失意得途事皆別。東隣少年樂未央。南客思歸腸欲絕。千里長河冰復冰。雲鴻冥冥楚山雪。

堯哥

二首一作舜歌。前篇賞鄭氏莊客去婦。後篇題逸。

爾室何不安。爾孝無與齊。一言應對姑。一度爲出妻。往轍才晚鐘。還轍及晨雞。往還跡徒新。很戾竟獨迷。

娥女無禮數。汚家如糞泥。父母吞聲瘦。禽鳥亦爲啼。如何天與惡。不得和鳴栖。

山色挽心肝。將歸盡日看。村肩藍輦子。野坐白髮官。

一作冠。

鷺弄方短短。花明碎攢攢。瑠璃堆可掬。琴瑟饒

多歡。翠韻仙窈窕。嵐漪出無端。養館洞庭秋。響答虛吹彈。



# 孟東野詩集卷第三

## 感興下

亂離

天下無義劍。中原多瘡痍。哀哀陸大夫。正直神反斯。子路已成血。嵇康今尙嗤。爲君每一慟。如劍在四肢。折羽不復飛。逝水不復歸。直松摧高柯。弱蔓將何依。朝爲春日歡。夕爲秋日悲。淚下無尺寸。紛紛天雨絲。積怨成疾疢。積恨成狂癡。怨草豈有邊。恨水豈有涯。怨恨馳我心。茫茫日何之。

勸酒

白日無定影。清江無定波。人無百年壽。百年復如何。堂上陳美酒。堂下列清歌。勸君金屈卮。勿謂朱顏醜。松柏歲歲茂。丘陵日日多。君看終南山。千古青峩峩。

去婦

君心匣中鏡。一破不復全。妾心藕中絲。雖斷猶牽連。安知御輪士。今日翻迴轅。一女事一夫。安可再移天。君聽去鶴言。哀哀七絲絃。

君子勿鬱鬱士有謗毀者作詩以贈之二首

君子勿鬱鬱。聽我青蠅歌。人間少平地。森聳山岳多。折翰不在道。覆舟不在河。須知一尺水。日夜增高波。

叔孫毀仲尼。臧倉掩孟軻。蘭艾不同香。自然難爲和。良玉燒不熱。直竹文不頗。自古皆如此。其如道在何。日往復不見。秋堂暮仍學。玄髮不知白。曉入寒銅覺。爲林未離樹。有玉猶在璞。誰把碧梧枝。刻作雲門樂。

聞砧

杜鵑聲不哀。斷猿啼不切。月下誰家砧。一聲腸一絕。杵聲不爲客。客聞髮自白。杵聲不爲衣。欲令遊子歸。

遊子

萱草生堂堦。遊子行天涯。慈親倚堂門。不見萱草花。

自歎

愁與髮相形。一愁白數莖。有髮能幾多。禁愁日日生。古若不置兵。天下無戰爭。古若不置名。道路無欷傾。太行聳巍峩。是天產不平。黃河奔濁浪。是天生不清。四蹄日日多。雙輪日日成。二物不在天。安能免營營。

求友

北風臨大海。堅冰臨河面。下有波瀾。對之無由見。求友須在良。得良終相善。求友若非良。非良中道變。欲知求友心。先把黃金鍊。

投所知

苦心知苦節。不容一毛髮。鍊金索堅貞。洗玉求明潔。自慙所業微。功用如鳩拙。何殊嫫母顏。對彼寒塘月。君存古人心。道出古人轍。盡美固可揚。片善亦不遏。朝向公卿說。暮向公卿說。誰謂黃鍾管。化爲君子舌。

一說清嶰竹。一說變嶰谷。三說四說時。寒花拆寒木。撲撲家道路。燦燦我衣服。豈直輝友朋。亦用慰骨肉。一暖荷疋素。一飽荷升粟。而況大恩恩。此身報得足。且將食藁勞。酬之作金刀。

### 病客吟

主人夜呻吟。皆入妻子心。遠客一作客子。晝呻吟。徒爲蠱鳥音。妻子手中病。愁思不復深。僮僕手中病。憂危獨難任。丈夫久漂泊。神氣自然沉。沉於滯疾中。何人免噓歔。大海亦有涯。高山亦有岑。沉一作此。憂獨無極。塵淚牙盈襟。

### 感懷

孟冬陰氣交。兩河正屯兵。煙塵相馳突。烽火日夜驚。太行險阻高。輓粟輸連營。奈何操弧者。不使梟巢傾。猶聞漢比兒。怙亂謀縱橫。擅搖干戈柄。呼叫豺狼聲。白日臨爾軀。胡爲喪丹誠。豈無感激士。以致天下平。登高望寒原。黃雲鬱崢嶸。坐馳悲風暮。歎息空沾纓。

### 離思

不寐亦不語。片月秋稍舉。孤鴻憶霜羣。獨鶴叫雲侶。怨彼浮花心。飄飄無定所。高張係繹帆。遠過梅根渚。迴織別離字。機聲有酸楚。

### 結交

鑄鏡須青銅。青銅易磨拭。結交遠小人。小人難姑息。鑄鏡圖鑑微。結交圖相依。凡銅不可照。小人多是非。  
傷春

兩河春草海水清。十年征戰城郭腥。亂兵殺兒將女去。二月三月花冥冥。千里無人旋風起。鸞啼鸞語荒  
城裏。春色不揀墓傍枝。紅顏皓色逐春去。春去春來那得知。今人看花古人墓。令人惆悵山頭路。

擇友

獸中有人性。形異遭人隔。人中有獸心。幾人能真識。古人形似獸。皆有大聖德。今人表似人。獸心安可測。  
雖笑未必和。雖哭未必戚。面結口頭交。肚裏生荆棘。好人常直道。不順世間逆。惡人巧諂多。非義苟且得。  
若是傲真人。堅心如鐵石。不諂亦不欺。不奢復不溺。面無慙色容。心無詐憂惕。君子大道人。朝夕恆的的。

夜憂

豈獨科斗死。所嗟文字捐。蒿蔓轉驕王。菱苻滅嬋娟。未遂擺鱗志。空思吹浪旋。何當再霖雨。洗濯生華鮮。

惜苦

于鵠值諫議。以毬不能官。焦蒙值舍人。以盃不得完。一作官。可惜大雅旨。意此小團欒。名迴不敢辨。心轉寔  
是難。不惜爲君轉。轉非君子觀。轉之復轉之。強轉誰能歡。哀哉虛轉言。不可窮波瀾。

寒地百姓吟

爲鄭相其年居河南  
畿內百姓大蒙矜卹

無火炙地眠。半夜皆立號。冷箭何處來。棘針風騷勞。一作騷騷霜吹破四壁。苦痛不可逃。高堂搥鐘飲。到曉聞烹炮。寒者願爲蛾。燒死彼華膏。華膏隔仙羅。虛遶千萬遭。到頭落地死。踏地爲遊遨。遊遨者是誰。君子爲鬱陶。

### 出東門

餓馬骨亦聳。獨驅出東門。少年一日程。衰叟十日奔。寒景不我爲。疾走落平原。眇默荒草行。恐懼夜魄翻。一生自組織。千首大雅言。道路如抽蠶。宛轉羈腸繁。

### 教坊歌兒

十歲小小兒。能歌得聞朝。一作朝天。六十孤老人。能詩獨臨川。去年西京寺。衆伶集講筵。能嘶竹枝詞。供養繩床禪。能詩不如歌。悵望三百篇。

### 訪疾

冷氣入瘡痛。夜來痛如何。瘡從公怒生。豈以私恨多。公怒亦非道。怒消乃天和。古有煥輝句。嵇康閑婆娑。請君吟嘯之。正氣庶不訛。

### 酒德

酒是古明鏡。輾開小人心。醉見異舉止。醉聞異聲音。酒功如此多。酒屈亦以深。罪人免罪酒。如此可爲箴。

### 冬日

老人行人事。百一不及周。凍馬四蹄吃。陟卓難自收。短景仄飛過。午光不上頭。少壯日在輝。衰老日與愁。日愁疑在日。歲箭迸如讎。萬事有何味。一生虛自囚。不知文字利。到死空遨遊。

飢雪吟

飢鳥夜相啄。瘡聲互悲鳴。冰腸一直刀。天殺無曲情。大雪壓梧桐。折柴墮崢嶸。安知鸞鳳巢。不與梟鳶傾。下有幸災兒。拾遺多新爭。但求彼失所。但誇此經營。一作誇誕君子亦拾遺。拾遺非拾名。將補鸞鳳巢。免與梟鳶并。因為飢雪吟。至曉竟一作不平。

偷詩

餓犬齧枯骨。自喫饑飢涎。今文與古文。各各稱可憐。亦如嬰兒食。餽桃口旋旋。唯有一點味。豈見逃景延。繩床獨坐翁。默覽有所傳。終當罷文字。別著逍遙篇。從來文字淨。君子不以賢。

晚雪吟

貧富喜雪晴。出門意皆饒。鏡海見纖悉。冰天步飄飄。一一仙子行。家家塵聲銷。小兒擊玉指。大耋歌聖朝。睿氣流不盡。瑞仙何復寥。始知望幸色。終疑異禮招。市井亦清潔。閭閻聳岩嶠。蒼生願東顧。翠華仍西遙。天念豈薄厚。宸衷多憂焦。憂焦致太平。以茲時比堯。古耳有未通。新詞有潛韶。甘為酒伶擯。坐恥歌女嬌。選音不易言。裁正逢今朝。今朝前古文。律異同一調。願於堯瑄中。奏盡鬱抑謠。

自惜

傾盡眼中力。抄詩過與人。自悲風雅老。恐被巴竹嗔。零落雪文字。分明鏡精神。坐甘冰抱晚。永謝酒懷春。徒有言言舊。慙無默默新。始驚儒教誤。漸與佛乘親。

老恨

無子抄文字。老吟多飄零。有時吐向床。枕席不解聽。鬪蟻甚微細。病聞亦清冷。小大不自識。自然天性靈。

詠懷上

湖州取解述情

雪水徒清深。照影不照心。白鶴未輕舉。衆鳥爭浮沉。因茲挂帆去。遂作歸山吟。

落第

曉月難爲光。愁人難爲腸。誰言春物榮。豈見葉上霜。一作獨見  
花上霜 雕鷲一作  
鶴鷲失勢病。一作飛  
失勢 鷓鴣假一作  
改翼翔。棄置復棄置。情如刀刃傷。

詠情一作感寓

濁水心易已。一作  
已 傾明波與初發。思逢海底人。乞取蚌中月。此興若未諧。此心終不歇。

病起言懷

強行尋溪一作淨水洗却殘病姿。花景晚晚盡。麥風清冷吹。交道臥來見。世情貧去知。高閑思楚逸。澹泊一作淺薄獸齊兒。終伴碧山侶。結言青桂枝。

秋夕貧居述懷

臥冷無遠夢。聽秋酸別情。高枝低枝風。千葉萬葉聲。淺井不供飲。瘦田長廢耕。今交非古交。貧語聞皆輕。

夜感自遣

一作矢志夜坐思歸  
楚江又作苦學吟

夜學曉未休。苦吟神鬼愁。如何不自閑。心與身為讎。死辱片時痛。生辱長年羞。清桂無直枝。苦江思舊遊。

再下第

一夕九起嗟。夢短不到家。兩度長安陌。空將淚見花。

下第東歸留別長安知己

共照日月影。獨爲愁思人。豈知鷓鴣鳴。一作鷓鴣鳴  
等閑鳴瑤草不得春。一片兩片雲。千里萬里身。雲歸嵩之陽。身寄

江之濱。棄置復何道。楚情吟白蘋。

失意歸吳因寄東臺劉復侍御

自念西上身。忽隨東歸風。長安日下影。又落江湖中。離婁豈不明。子野豈不聰。至寶非眼別。至音非耳通。

因緘俗外詞。一作物  
外詞仰寄高天鴻。

下第東南行

越風東南清。楚日瀟湘明。試遂伯鸞去。還作靈均行。江離伴我泣。海月投人驚。失意容兒改。畏塗惟命輕。時聞喪侶猿。一叫千愁并。一作生

歎命

三十年來命。唯藏一卦中。題詩還怨易。問易蒙復蒙。本望文字達。今因文字窮。影孤別離月。衣破道路風。歸去不自息。耕耘成楚農。

遠遊

慈烏文遠飛。孝子念先歸。而我獨何事。四時心有違。江海戀空積。波濤信來稀。長爲路傍食。着盡家中衣。別一作烈。劍不割物。離人難作威。遠行少童僕。驅使無是非。爲性玩好盡。積愁心緒微。始知時節駛。愛一作夏。日非長輝。

商州客舍

商山風雪壯。遊子衣裳單。四望失道路。百憂攢肺肝。日短覺易老。夜長知至寒。淚流瀟湘絃。調苦屈宋彈。識聲今所易。識意古所難。聲意今詎辨。一作竟。高明鑒其端。誰辨

長安旅情

盡說青雲路。有足皆可至。我馬亦四蹄。出門似無地。玉京十二樓。峩峩倚青翠。下有千朱門。何門薦孤士。

長安羈旅

聽樂離別中。聲聲入幽腸。曉淚滴楚瑟。夜魂遶吳鄉。幾迴羈旅情。夢覺殘燭光。

渭上思歸

獨訪千里信。迴臨千里河。家在一作吳楚鄉。淚寄東南一作波流。

登科後

昔日齷齪不足誇。今朝放蕩思無涯。春風得意馬蹄疾。一日看盡長安花。

初於洛中選

塵土日易沒。驅馳力無餘。青雲不我與。白首方選書。宦途事非遠。拙者取自疎。終然戀皇邑。誓以結吾廬。帝城富高門。京路饒勝居。碧水走龍狀。蜿蜒遶庭除。尋常異方客。過此亦踟蹰。

乙酉歲舍弟扶持歸興義莊居後獨止舍待替人

誰言舊居止。主人忽成客。僮僕強與言。相懼終脉脉。出亦何所求。入亦何所索。飲食迷精麤。衣裳失寬窄。迴風卷閑簾。新月生空壁。士有百役身。官無一姓宅。丈夫恥自飾。衰鬢從颯白。蘭交早已謝。榆景徒相迫。惟予中心鏡。不語光歷歷。

西齋養病夜懷多感因呈上從叔子雲

遠客夜衣薄。獸眠待雞鳴。一床空月色。四壁秋蛩聲。守淡遺衆俗。養痾念餘生。方全君子拙。恥學小人明。蚊蝨亦有時。羽毛各有成。如何騏驥跡。蹉跎未能行。西北有平路。運來無相輕。





孟東野詩集卷第四

詠懷下

秋懷十五首

孤骨夜難臥。吟蟲相唧唧。老泣無涕洟。秋露爲滴瀝。去壯暫如翦。來衰紛似織。觸緒無新心。叢悲有餘憶。詎忍逐南帆。江山踐往昔。

秋月顏色冰。去聲老客志氣單。冷露滴夢破。峭風梳骨寒。席上印病文。腸中轉愁盤。疑懷無所憑。虛聽多無

端。梧桐枯嶢嶢。聲響如哀彈。

一尺月透戶。仞粟如劍飛。老骨坐亦驚。病力所尙微。蠱苦貪。一作剪色。烏危巢焚輝。孀娥理故絲。一作頰緒。孤哭

一作坐。抽餘意。浮年不可追。衰步多夕歸。

秋至老更貧。破屋無門扉。一片月落牀。四壁風入衣。踈夢不復遠。弱心良易歸。商葩將去。一作老。綠。繚繞爭

餘輝。野步踏事少。病謀向物違。幽幽草根蟲。生意與我微。

竹風相戛語。幽閨暗中聞。鬼神滿衰聽。恍惚難自分。商葉隨乾雨。秋衣臥單雲。病骨可剗物。酸呻亦成文。瘦攢如此枯。壯落隨西曛。裊裊一線命。徒言繫網縕。

老骨懼秋月。秋月力劍稜。織輝不可干。冷魂坐自凝。羈雌巢空鏡。仙鷗蕩浮冰。驚步恐自翻。病大不敢凌。單床寤皎皎。瘦臥心兢兢。洗河不見水。透濁爲清澄。詩壯昔空說。詩衰今何憑。

老病多異慮。朝夕非一心。商蟲哭衰運。繁響不可尋。秋草瘦如髮。貞芳綴踈金。晚鮮詎幾時。馳景還易陰。弱習徒自恥。暮知欲何任。露才一見讒。潛智早已深。防深不防露。此意古所箴。

歲暮景氣乾。秋風兵甲聲。織織勞無衣。嗶嗶篴自鳴。商聲聳中夜。蹇支廢前行。青髮如秋園。一翦不復生。少年如餓花。瞥見不復明。君子山岳定。小人絲毫爭。多爭多無壽。天道戒其盈。

冷露多瘁索。枯風饒吹噓。秋深月清苦。蟲老聲麤踈。頽珠枝纍纍。芳金蔓舒舒。草木亦趣時。寒榮似春餘。

自悲一作悲彼零落生。與我心何如。

老人朝夕異。生死每日中。坐隨一啜安。臥與萬景空。視短不到門。聽澀詎逐風。還如刻削形。免有織悉聰。浪浪謝初始。皎皎幸歸終。孤隔文章友。親密蒿萊翁。歲綠閔以黃。秋節迸已一作窮窮。四時旣相迫。萬慮自

然叢。南逸浩淼際。北貧磽确中。曩懷沉遙江。衰思結秋嵩。鋤食難滿腹。葉衣多醜躬。塵縷不自整。古吟將誰通。幽竹嘯鬼神。楚鐵生虬龍。志生多異感。運鬱由邪衷。常思書破衣。至死教初童。習樂莫習聲。習聲多頑聾。明明胷中言。願寫爲高崇。

幽苦日日甚。老力步步微。常恐暫下床。至門不復歸。飢者重一食。寒者重一衣。泛廣豈無涘。恣行亦有隨。

一作隨時語中失次第。身外生瘡痍。桂蠹既潛汚。一作桂花損貞姿。詈言一失香。千古聞臭詞。將死始前悔。前悔

不可追。哀哉輕薄行。終日與駟馳。一作欲驅馳

流運閃欲盡。枯折皆相號。棘枝風哭酸。桐葉霜顏高。老蟲乾鐵鳴。驚獸孤玉咆。商氣洗一作聲瘦。晚陰驅

景勞。集耳不可遏。噎神不可逃。蹇行散餘鬱。幽坐誰與曹。抽壯無一線。剪懷盈千刀。清詩既名朮。一作詩清既名郊

金菊亦姓陶。收拾昔所棄。咨嗟今比毛。幽幽歲晏言。零落不可操。

霜氣入病骨。老人身生冰。衰毛暗相刺。冷痛不可勝。鷺鷥伸至明。強強攬所憑。瘦坐形欲折。腹飢心將崩。

勸藥左右愚。言語如見憎。聳耳噎神開。一作聳聳神氣開始知功用者。一作能日中視餘瘡。暗鑿一作聞繩一作蠅。彼

一何酷。此味半點凝。潛毒爾無馱。餘生我堪矜。凍飛幸不遠。冬令反心懲。出沒各有時。寒熱苦一作相凌。

仰謝調運翁。請命願有徵。

黃河倒上天。衆水有却來。人心不及水。一直去不迴。一直亦有巧。不肯至蓬萊。一直不知疲。唯聞至省臺。

忍古不失古。失古志易摧。失古劍亦折。失古琴亦哀。夫子失古淚。當時落漼漼。詩老失古心。至今寒皚皚。

古骨無濁肉。古衣如薜苔。勸君勉忍古。忍古銷塵埃。

詈言一作不見血。殺人何紛紛。聲如窮家犬。吠竇何閶閶。詈痛幽鬼哭。詈侵黃金貧。言詞豈用多。憔悴在

一聞。古詈舌不死。至今書云云。今人詠古書。善惡宜自分。秦火不爇舌。秦火空爇文。所以詈更生。至今橫

網緼。

靖安寄居

寄靜不寄華。愛茲嶠嶠居。渴飲濁清泉。饑食無名蔬。一作葉不敢火。補衣亦寫書。古云儉成德。今乃寔起予。戇叟戇不足。賢人賢有餘。役生皆促促。心竟誰舒舒。萬馬踏風衢。衆塵隨奔車。高賓盡不見。大道夜方虛。臥有洞庭夢。坐無長安儲。英髦空駭耳。煙火獨微如。厚念恐傷性。薄田憶親鋤。一作忙世不出力。冬竹肯抽葅。外物莫相誘。約心誓從初。碧芳既似水。日日詠歸歟。

雪

忽然太行雪。昨夜飛入來。峻嶒墮庭中。嚴白何皚皚。奴婢曉開戶。四支凍徘徊。咽言詞不成。告訴情狀摧。官給未入門。家人盡以灰。意勸莫笑雪。笑雪貧爲災。將暖此殘疾。典賣爭致盃。教令再舉手。誇曜餘生才。強起吐巧詞。委曲多新裁。爲爾作非夫。忍恥轟喝雷。書之與君子。庶免生嫌猜。

春愁

春物與愁客。遇時各有違。故花辭新枝。新淚落故衣。日暮兩寂寞。飄然亦同歸。

懊惱

惡詩皆得官。好詩空抱山。抱山冷殘殘。終日悲顏顏。好詩更相嫉。劍戟生牙關。前賢死已久。猶在咀嚼間。以我殘抄身。清峭養高閑。求閑未得閑。衆謂瞋虤虤。

遊適上

遊城南韓氏莊

初凝瀟湘水。鑱在朱門中。時見水底月。動搖池上風。一作有時池底山。動搖池上風。清氣潤竹木。白光連虛空。浪簇霄漢羽。岸芳金碧叢。何言數畝間。環泛路不窮。願逐一作常慕神仙侶。飄然一作從茲汗漫通。

與二三友秋霄會話清上人院

何處山不幽。此中情又別。一僧敲一磬。七子吟秋月。激石泉韻清。寄枝風嘯咽。冷然諸境靜。頓覺浮累滅。扣寂兼探真。通宵詎能輟。

夜集

好鳥無雜棲。華堂有嘉携。琴樽互傾奏。歌賦相和諧。但嘉魚水合。莫令雲雨乖。一為鷓鴣彈。再鼓壯士懷。初景待誰曉。新春逐一作還君來。願言良友會。高駕不知迴。

招文士飲

曹劉不免死。誰敢負年華。文士莫辭酒。詩人命屬花。退之如放逐。李白自矜夸。萬古忽將似。一朝同嘆嗟。何言天道正。獨使地形斜。南士愁多病。北人悲去家。梅芳已流管。柳色未藏鴟。相勸罷吟雪。相從愁飲霞。醒時不可過。愁海浩無涯。

陪侍御叔遊城南山墅

夜坐擁腫亭。晝登崔嵬岑。日窺萬峯首。月見雙泉心。松氣清耳目。竹氛碧衣襟。佇想一作仰悲琅玕字。數聽枯

槁吟。

登華嚴寺樓望終南山贈林校書兄弟

地脊亞爲崖。聳出冥冥中。樓根插迥雲。殿翼翔危空。前山胎元氣。靈異生不窮。勢吞萬象高。秀奪五岳雄。一望俗慮醒。再登仙願崇。青蓮三居士。晝景真賞同。

遊終南山

南山塞天地。日月石上生。高峯夜留景。太白峯西黃昏後見餘日深谷晝未明。山中人自正。路險心亦平。長風驅松柏。聲

拂萬壑清。到此悔讀書。朝朝近浮名。

遊終南龍池寺

飛鳥不到處。僧房終南巔。龍在水長碧。雨開山更鮮。步出白日上。坐依清溪邊。地寒松桂短。石險道路一作

磴。苔偏晚磬送歸客。數聲落遙天。

南陽公請東櫻桃亭子春燕

萬木皆未秀。一林先含春。此地獨何力。我公布深仁。霜葉日舒卷。風枝遠埃塵。初英濯紫霞。飛雨流清津。

賞異出囂雜。折芳積歡忻。文心茲焉重。俗尙安能珍。碧玉糝粉比。飛瓊穠艷均。鴛鴦七十二。花態併相新。常恐遺秀志。迨茲廣讌陳。芳菲爭勝引。歌詠竟良辰。方知戲馬會。永謝登龍賓。

遊華山雲臺觀

華嶽獨靈異。草木恆新鮮。山盡五色石。水無一色泉。仙酒不醉人。仙芝皆延年。夜聞明星館。時韻女蘿絃。敬茲不能寐。焚栢吟道篇。

喜與長文上人宿李秀才小山池亭

燈盡語不盡。主人庭砌幽。柳枝星影曙。蘭葉露華浮。塊嶺笑羣岫。片池輕衆流。更聞清淨子。逸唱頗難儔。

邀花伴時在朔方

邊地春不足。十里見一花。及時須遨遊。日暮饒風沙。

石淙十首

巖谷不自勝。水木幽奇多。朔風入空曲。涇一作徑流無大波。迢遞逗難盡。參差勢相羅。雪霜有時洗。塵土無由和。潔冷誠未厭。晚步將如何。

出曲水未斷。入山深更重。泠泠若仙語。皎皎多異容。萬響不相雜。四時皆自濃。日月牙分照。雲霞各生峯。久迷向方理。逮茲聳前蹤。

荒策每恣遠。躑步難自迴。已抱苔蘚疾。一作疲。尙凌潺湲隈。驛驥苦銜勒。籠禽恨摧頰。實力苟未足。浮誇信悠哉。顧惟非時用。靜言還自吟。

朔水刀劍利。秋石瓊瑤鮮。魚龍氣不腥。潭洞狀更妍。磴雪入呀谷。掬星洒遙天。聲忙一作迫。不及韻。勢疾多

斷漣。輸去雖有恨。躁氣一作翻。一何顛。蜿蜒相纏掣。犖确亦迴旋。黑草濯鐵髮。白苔浮冰錢。具一作其。生此云遙。

非德不可甄。何況被犀士。制之空以權。始知靜剛猛。文教從來先。

空谷聳視聽。幽湍澤心靈。疾流脫鱗甲。疊岸衝風霆。丹巘墮瓌景。霽波灼一作閃。虛形。淙淙脰厚軸。稜稜攢

高冥。弱棧跨旋碧。危梯倚凝青。飄飄鶴骨仙。飛動鼈背庭。一作亭。常聞誇大言。下顧皆細萍。

百尺明鏡流。千曲寒星飛。爲君洗故物。有色如新衣。不飲泥土污。但飲雪霜飢。石稜玉纖纖。草色瓊霏霏。谷磴有餘力。溪春亦多機。從來一智萌。能使衆利歸。因之山水中。喧然論是非。

入深得奇趣。昇險爲良躋。搜勝有聞見。逃俗無蹤蹊。穴流恣迴轉。竅景忘東西。躑獸鮮猜懼。羅人巧罝罟。幽馳異處所。忍慮多端倪。虛獲我何飽。實歸彼非迷。斯文浪云潔。此旨誰得齊。

屑珠瀉潺湲。裂玉何威瓌。若調千瑟絃。未果一曲諧。古駭毛髮慄。險驚視聽乖。二士一作士。老皆勁骨。風趨緣

歆崖。地遠有餘遺。一作美。我遊採棄一作奇。懷乘時幸勤鑒。前恨多幽霾。弱力謝剛健。蹇策貴安排。始知隨事靜。

何必當夕齋。

昔浮南渡鷗。今攀朔山景。物色多度削。吟笑還孤永。日日凍有稜。雪霜空無影。玉噴不生冰。瑤渦旋成井。潛角時聳光。隱鱗乍漂罔。再吟獲新勝。返步失前省。愜懷雖已多。惕慮未能整。頽陽落何處。昇魄銜疎嶺。聖朝搜巖谷。此地多遺玩。怠墮成遠遊。頑疎恣靈一作虛。觀勁鷗刷幽視。怒水懾餘湍。一作慄。曾是結芳一作茅。誠遠茲勉流倦。冰條聳危慮。霜翠瑩遐盼。物誘信多端。荒尋諒難遍。去矣朔之隅。脩然楚之甸。

### 遊韋七洞庭別業

洞庭如瀟湘。疊翠蕩浮碧。松桂無赤日。風物饒清激。逍遙展幽韻。參差逗良覲。道勝不知疲。冥搜自無斁。曠然青霞抱。永矣白雲適。崕峒非凡鄉。蓬瀛在仙籍。無言從遠尙。還思君子識。一作茲焉與之敵。波濤漱古岸。鏗鏘辨奇石。靈響非外求。殊音自中積。人皆走煩濁。君能致虛寂。何以祛擾擾。叩調清淅淅。旣懼豪華損。誓從詩書益。一舉獨往姿。再搖飛遁迹。山深有變異。意愜無驚惕。采翠奪日月。照耀迷晝夕。松齋何用掃。蘿院自然滌。業峻謝煩蕪。文高追古昔。暫遙朱門戀。終立青史績。物表易淹留。人間重離析。難隨洞庭酌。且醉橫塘席。

### 越中山水

日一作動。覺耳目勝。我來山水州。蓬瀛若髣髴。田一作四。野如泛浮。碧嶂幾千遶。清泉一作源。萬餘流。莫窮合沓步。孰盡派別遊。越水淨難污。越天陰易收。氣鮮無隱物。目視遠更周。舉俗一作族。媚葱蒨。連冬擷芳柔。菱湖有

餘翠茗圃無荒疇。賞異忽已遠。探奇誠淹留。永言終南色。去矣銷人憂。

春集越州皇甫秀才山亭

嘉賓一作嘉誘  
又作善友在何處。置亭春山顛。顧余寂寞者。謬廁芳菲筵。視聽日澄澈。聲光坐連綿。晴湖瀉峯嶂。翠浪

多萍蘚。何以逞高志。爲君吟秋天。一作  
秋篇

和皇甫判官遊琅琊溪

山中琉璃境。物外琅琊溪。房廊逐巖壑。道路隨高低。碧瀨漱白石。翠煙含青蜺。客來暫遊踐。意欲忘簪珥。樹杪燈火夕。雲端鐘梵齊。時同雖可仰。跡異難相携。唯當清宵夢。髣髴願一作  
攀躋期。

孟東野詩集卷第五

遊適下

汝州南潭陪陸中丞公燕

一雨百泉漲。南潭夜來深。分明碧沙底。寫出青天心。遠客洞庭至。因茲滌煩襟。既登飛一作青雲舫。願奏清風琴。高岸立旗戟。潛蛟失一作互浮沉。威稜護斯浸。魴魴逃所侵。山態變初霽。水聲流新音。耳目極眺聽。潺湲與嶽岑。誰言柳太守。空有白蘋吟。

汝州陸中丞席喜張從事至同賦十韻

汝水無濁波。汝山饒奇石。大賢爲此郡。佳士來如積。有客乘白駒。奉義愜所適。清風蕩華館。雅瑟泛瑤席。芳醕靜無喧。金樽光有滌。縱情孰慮損。聽論自招益。願折若木枝。却彼曜靈夕。貴賤一相接。一作憂。一作憂情。一作忽轉易。會合勿言輕。別離古來惜。請君駐征車。良遇難再覿。

夜集汝州郡齋聽陸僧辯彈琴

康樂寵詞客。清宵意無窮。徵文北山一作外。借月南樓中。千里愁併盡。一樽歡暫同。胡爲夏楚琴。一作淅瀝起寒風。

同年春燕

少年三十士。嘉會良在茲。高歌搖春風。醉舞摧花枝。意蕩晚晚景。喜凝芳菲時。馬跡攢驥裊。樂聲韻參差。視聽改舊趣。物象含新姿。紅雨花上滴。綠煙柳際垂。淹中講精義。南皮獻清詞。前賢與今人。千載爲一期。明鑒有皎潔。澄玉無磷緇。永與沙泥別。各整雲漢儀。盛氣自中積。英名日四馳。塞鴻絕儔匹。海月難等夷。鬱折忽已盡。親朋樂無涯。幽蘅發空曲。芳杜綿所思。浮跡自聚散。壯心誰別離。願保金石志。無令有奪移。羅氏花下奉招陳侍御

眼在枝上春。落地成埃塵。不是風流者。誰爲攀折人。寧辭波浪闊。莫道往來頻。拾紫豈宜晚。掇芳須及晨。勞收賈生淚。強起屈平身。花下本無俗。酒中別有神。遊蜂不飲故。戲蝶亦爭新。萬物盡如此。過時非所珍。遊石龍渦。四壁千仞散泉如雨

石龍不見形。石雨如散星。山下晴皎皎。山中陰泠泠。水飛林木杪。珠綴莓苔屏。蓄異物皆別。當晨景欲暝。泉芳春氣碧。松月寒色青。險力一作陰力此獨壯。猛獸亦不停。日暮且迴去。浮心恨一作尙未寧。

浮石亭

曾是風雨力。崔嵬漂來時。落星夜皎潔。近榜朝透迤。翠斂遞明滅。清漚瀉欹危。況逢蓬島仙。會合良在茲。

看花五首

家家有一作如芍藥。不妨至溫柔。溫柔一同女。紅笑笑不休。月娥雙雙下。楚艷枝枝浮。洞裏逢仙人。一作幸逢仙人立

綽約青一作清宵遊。

芍藥誰爲壻。人人不敢來。唯應待詩老。日日殷勤開。玉立無氣力。春凝且徘徊。將何謝青春。痛飲一百盃。芍藥吹欲盡。無奈曉風何。餘花欲誰待。唯待諫郎過。諫郎不事俗。黃金買高歌。高歌夜更清。花意晚更多。飲之不見底。醉倒深紅波。紅波蕩諫心。諫心終無它。獨遊終難醉。挈榼徒經過。閑花不解語。勸得酒無多。三年此村落。春色入心悲。料得一孀婦。經一作它時獨淚垂。

### 濟源春

太行橫偃脊。百里芳崔嵬。濟濱花異顏。枋口雲如裁。新畫彩色濕。上界光影來。深紅縷草木。淺碧珩沂洄。千家門前飲。一道傳禊盃。玉鱗吞金鈎。仙璇琉璃開。朴童茂言語。善俗無驚猜。狂吹寢恆宴。曉清夢先迴。治生鮮墮夫。積學多深材。再遊詎癡憒。一洗驚塵埃。

### 濟源寒食七首

風巢嫋嫋春鷓鴣。無子老人仰面嗟。柳弓葦箭一作蒿矢覩不見。高紅遠綠勞相遮。女嬋一作蟬童子黃短短。耳中間人惜春晚。逃蜂匿蝶踏地來。拋却齋糜一瓷碗。一日踏春一百迴。朝朝沒脚走芳埃。饑童餓馬掃花餵。向晚飲溪三兩盃。莓苔井上空相憶。轆轤索斷無消息。酒人皆倚春髮綠。病叟獨藏秋髮白。

長安落花飛上天。南風引至三殿前。可憐春物亦朝謁。唯我孤一作獨吟渭水邊。  
 枋口花間掣手歸。嵩陽山一作為我留一作駐。紅暉可憐躑躅千萬尺。柱地柱天疑一作今。欲飛。  
 蜜蜂為主各磨牙。咬盡村中萬木花。君家甕甕今應滿。五色冬籠甚可誇。

遊枋口二首

一步復一步。出行一作行路。千里幽。為取山水意。故作寂寞遊。太行青巔高。枋口碧照浮。明明無底鏡。泛泛忘  
 機鷗。老逸不自限。病狂不可周。恣閑饒淡薄。怠玩多淹留。芳物競碗晚。綠梢挂新柔。和友鸞相遶。言語亦  
 以稠。一作和友鸞相遶。遠飛鷹亦以稠。始知萬類然。靜躁難相求。  
 聳我殘病骨。健如一仙人。鏡中照千里。鏡浪洞百神。此神日月華。不作尋常春。三十夜皆明。四時晝恆新。  
 鳥聲盡依依。獸心亦忻忻。澄幽出所怪。閃異坐微緗。可來復可來。此地靈相親。

與王二十一員外涯遊枋口柳溪

萬株古柳根。挈此磷磷溪。野榜多屈曲。仙潯無端倪。春桃散紅煙。寒竹含晚淒。曉聽忽以異。芳樹安能齊。  
 共疑落鏡中。坐泛紅景低。水意酒易醒。浪情事非迷。小儒峭章句。大賢嘉提携。潛竇韻靈瑟。翠崖鳴玉珪。  
 主人稷高翁。德茂芝木畦。鑿出幽隱端。氣象皆昇躋。曾是清樂抱。逮茲幾省溪。宴位席蘭草。濫觴驚鳧鷺。  
 靈味薦魴鱖。金花屑橙壘。江調擺衰俗。洛風遠塵泥。徒言奏狂狷。詎敢忘筌蹄。

與王二十一員外涯遊昭成寺

洛友寂寂約。省騎霏霏塵。遊僧步晚磬。話茗含芳春。  
□□作 瑤策冰入手。粉壁畫瑩神。頰廊芙蓉霽。碧殿琉璃津。  
一作玄講島海。一作岳盡淵詠文字新。屢笑寒竹讌。況接青雲賓。顧慙餘眷下。衰瘵嬰殘身。

嵩少

沙彌舞袈裟。走向躑躅飛。閑步亦惺惺。芳援相依依。噎塞春咽喉。蜂蝶事光輝。羣嬉且已晚。孤引將何歸。流艷去不息。朝英亦疎微。

旅次洛城東水亭

水竹色相洗。碧花動軒楹。自然逍遙風。蕩滌浮競情。霜落葉聲燥。景寒人語清。我來招隱亭。衣上塵暫輕。

洛橋晚望

天津橋下冰初結。洛陽陌上人行絕。榆柳蕭疎樓閣閑。月明直見嵩山雪。

居處

北郭貧居

進乏廣莫力。退爲蒙瀧籠。一作籠 居三年失意歸。四向相識疎。地僻草木壯。荒條扶我廬。夜貧燈燭絕。明月照吾書。欲識貞靜操。秋蟬飲清虛。

題陸鴻漸上饒新開山舍

驚彼武陵狀。移歸此巖邊。開亭擬貯雲。鑿石先得泉。嘯竹引清吹。吟花成一作新篇。乃知高潔情。擺落區中緣。

題韋承總吳王故城下幽居

韋生相門子孫

才飽身自貴。巷荒門豈貧。韋生堪繼相。孟子願依隣。夜思琴一作酒。語切畫情茶味新。霜枝留過鵲一作風竹。掃蒙塵。郢唱一聲發。吳花千片春。對君何所得。歸去覺情真。

蘇州崑山惠聚寺僧房

昨日到上方。片雲掛一作石牀。錫杖莓苔青。袈裟松柏香。晴磬無短韻。古燈含永光。有時乞鶴歸。還訪一作逍遙場。

題從叔述靈巖山壁

換却世上心。獨起山中情。露衣涼且鮮。雲策高復輕。喜見夏日來。變為松景清。每將逍遙聽。不厭颼颼聲。遠念塵末宗。未疎俗間名。桂枝一作妄舉手。一作萍路空勞生。仰謝開淨絃。相招時一鳴。

題林校書花嚴寺書窻

隱詠不誇俗。問禪徒淨居。翻將白雲字。一作寄向青蓮書。擬古投松坐。就明開紙疎。昭昭一作綿綿。南山景。獨與心相如。

藍溪元居士草堂

市井不容義。義歸山谷中。夫君宅松桂。招我樓蒙籠。人朴情慮肅。境閑視聽空。清溪宛轉水。脩竹徘徊風。木倦採樵子。土勞稼穡翁。讀書業雖異。敦本志亦同。藍岸青漠漠。藍峯碧崇崇。日昏各命酒。一作返。寒蛩鳴蕙叢。一作寒鹿鳴荒叢。

新卜青羅幽居奉獻陸大夫

黔婁住何處。仁邑無餒飢。一作寒。豈誤舊羈旅。變為新閑安。二頃有餘食。三農行可觀。籠禽得高巢。轍鮒還曾瀾。翳翳桑柘墟。紛紛田里歡。兵戈忽消散。耦耕非艱難。嘉木偶良酌。芳陰庇清彈。力農雖一事。趣世徒萬端。靜覺本相厚。動為末所殘。此外有餘暇。鋤荒出幽蘭。

酬孟十二新居見寄

陸長源

大道本夷曠。高情亦冲虛。因隨白雲意。偶逐青羅居。青羅分蒙密。四序無慘舒。餘清濯子衿。散彩還吾廬。去歲登美第。榮名在公車。將必繼管蕭。豈唯躡應徐。首夏尙清和。殘芳遍丘墟。褰幃蔭葱柳。汲井滋園蔬。達者貴知心。古人不顯餘。愛君蔣生逕。且著茂陵書。

題韋少保靜恭宅藏書洞

高意合天製。自然狀無窮。仙華凝四時。玉蘚生數峯。書祕漆文字。匣藏金蛟龍。閑為氣候肅。開作雲雨濃。洞隱諒非久。巖夢誠必通。將綴文士集。貫就真珠叢。

生生亭

灘鬧不妨語。跨溪仍一作宜。置亭。置亭。巒嶠頭。開窗納遙青。遙青新畫出。三十六扇屏。裊裊立平地。稜稜浮高冥。一日數開扉。仙閃目不停。徒誇遠方岫。曷若中峯靈。拔意千餘丈。浩言永堪銘。浩言無愧同。愧同忍醜醒。致之未有力。力任君子聽。

寒溪九首

霜路一作洗水色盡。寒溪見纖鱗。幸臨虛空鏡。照此殘悴身。潛滑不自隱。露底瑩更新。谿如君子懷。曾是危

陷人。始明淺俗心。夜結朝已津。淨漱一掬碧。遠消千慮塵。始知泥步泉。莫與山源隣。

洛陽岸邊道。孟氏莊前溪。舟行素冰拆。一作舟行聲作青瑤嘶。綠水結綠玉。白波生白珪。明明寶鏡中。物物

天照齊。仄步下危曲。攀枯聞婦啼。霜芬一作宿霧稍消一作蕭索歇。凝景微茫齊。癡坐直視聽。鷙行失蹤蹊。岸童斲棘

勞。語言多悲悽。

曉飲一盃酒。踏雪過清溪。波瀾凍為刀。剗剗鳥與鷺。宿羽皆翦棄。血聲沉沙泥。獨立欲何語。默念心酸嘶。凍血莫作春。作春生不齊。凍血莫作花。作花發婦啼。幽幽棘針村。凍死難耕犁。

篙工礎玉星。一路隨迸螢。朔凍哀徹底。獠饑咏潛鯉。冰齒相磨嚙。風音酸鐸鈴。清悲不可逃。洗出纖悉聽。

碧激卷已盡。彩口飛飄零。下躡滑不定。上棲折難停。哮嚙呻唾冤。仰訴何時寧。

一曲一直水。白龍何鱗鱗。凍飈雜碎號。蓋音坑谷辛。瓜楸吃無力。飛走更相仁。猛弓一折絃。餘喘爭來賓。

大嚴□□立。小殺不復陳。皎皎何皎皎。氤氳復氤氳。瑞晴刷日月。高碧開星辰。獨立兩脚雪。孤吟千慮新。天譏徒昭昭。箕舌虛斷斷。堯聖不聽汝。孔微亦有臣。諫書竟成章。古義終難陳。

因凍死得食。殺風仍不休。以兵爲仁義。仁義生刀頭。刀頭仁義腥。君子不可求。波瀾抽劍冰。相劈如仇讎。尖雪入魚心。魚心明愀愀。恍如罔雨說。似訴割切由。誰使異方氣。入此中土流。翦盡一月春。閉爲百谷幽。仰懷新霽光。下照疑憂愁。

溪老哭甚寒。涕泗冰珊珊。飛死走死形。雪裂紛心肝。劍刃凍不割。弓絃彊難彈。常聞君子武。不食天殺殘。斷玉掩骼鬻。吊瓊哀闌干。

溪風擺餘凍。溪景銜明春。玉消花滴滴。虬解光鱗鱗。懸步下清曲。消期濯芳津。千里冰裂處。一勺暖亦仁。凝精牙相洗。漪漣競將新。忽如劍瘡盡。初起百戰□。

### 立德新居十首

立德何亭亭。西南聳高隅。陽崖洩春意。井圃留冬蕪。勝引卽紆道。幽行豈通衢。碧峯遠相揖。清思誰言孤。寺秩雖未貴。家醪良可哺。

聳城架霄漠。絜宅涵細縕。開門洛北岸。時鎖嵩陽雲。夜高星辰大。晝長天地分。厚韻屬疎語。薄名謝囂聞。茲焉有殊隔。永矣難及羣。

賓秩已覺厚。私儲常恐多。清貧聊自爾。素責將如何。儉教先勉力。修襟無餘它。良棲一枝木。靈巢片葉荷。

仰笑鷓鴣輩。委身拂天波。

疎門不掩水。洛色寒更高。曉碧流視聽。夕清濯衣袍。爲於仁義得。未覺登陟勞。遠岸雪難暮。勁枝風易號。霜禽各嘯侶。吾亦愛吾曹。

崎嶇有懸步。委曲饒荒尋。遠樹足良木。疎巢無爭禽。素魄銜夕岸。綠水生曉潯。空曠伊洛視。髣髴瀟湘心。何必尙遠異。憂勞滿行襟。

懸途多仄足。崎圃無脩畦。霜蘭與宿艾。手搨心不迷。品子懶讀書。轅駒難服犁。虛食日相投。夸腸詎能低。恥從新學遊。願將古農齊。

都城多聳秀。愛此高縣居。伊雒遶街巷。鴛鴦飛閭閻。翠景何的礫。霜颺飄空虛。突出萬家表。獨治二畝蔬。一作餘。一句一手版。十日九手鋤。

手鋤良自勗。激勸亦已饒。畏彼梨栗兒。空資玩弄驕。夜景臥難盡。晝光坐易消。治舊得新義。耕荒生嘉苗。鋤治苟愜適。心形俱逍遙。

玉蹄裂鳴水。金綬忽照門。拂拭貧士席。拜候丞相軒。德疎未爲高。禮至方覺尊。豈惟耀茲日。可以榮遠孫。如何一陽朝。獨荷衆瑞繁。

長南富水木。寂寥蔽光輝。此地足文字。及時隘驂駢。仄雪踏爲平。澀行變如飛。令畦生氣色。嘉綠新霏微。天意資厚養。賢人肯相違。末一章冬至日鄭相至門以屬意在焉。

# 孟東野詩集卷第六

## 行役

西上經靈寶觀觀即尹真人舊宅

道士無白髮。語音一作言。靈泉清。青松多壽色。白石恆夜明。放步霽霞起。振衣華風生。真文祕中頂。寶氣浮

四楹。一片古關路。萬里今人行。上仙一可見。驅策徒西征。

## 泛黃河

誰開崑崙源。流出混沌河。積雨一作羽。飛作風。驚龍噴為波。湘瑟颼颼絃。越賓一作客。嗚咽歌。有根一作雙眼。不可洗。虛此來經過。

## 往河陽宿峽陵寄李侍御

暮天寒風悲屑屑。啼鳥遶樹泉水噎。行路解鞍投古陵。蒼蒼隔山見微月。鴉鳴犬吠霜煙昏。開囊拂巾對盤飧。人生窮達感知己。明日投君申片言。

## 鷓鴣路溪行呈陸中丞

鷓鴣路不可越。二十六渡溪。有物飲碧水。高林挂青蜺。歷覽道更險。驅使跡頻睽。視聽易常主。心魂牙相迷。浪石忽搖動。沙堤信難躋。危峯紫霄外。古木浮雲齊。出阻望汝郡。太賢多招携。疲馬戀舊秣。羈禽思故棲。

應憐泣楚玉。棄置如塵泥。

獨宿峴首憶長安故人

月迴無隱物。況復大江秋。江城與沙村。人語風颼颼。峴亭當此時。故人不同遊。故人在長安。亦可將夢求。

自商行謁復州盧使君虔

一身遶千山。遠作行路人。未遂東吳歸。暫出西京塵。仲宣荊州客。今余一作竟陵賓。往蹟雖不同。託意皆

有因。商嶺莓苔滑。石坂上下頻。江漢沙泥潔。永日一作光景新。獨淚起殘夜。孤吟望初晨。驅馳竟何事。章

句依深仁。

夢澤行

楚山爭蔽虧。日月無全輝。楚路饒迴惑。旅人一作迷歸。騏驥思北首。鷓鴣願南飛。我懷京雒遊。未厭風

塵衣。

京山行

衆竄聚病馬。流血不得行。後路起夜色。前山聞虎聲。此時遊子心。百尺風中旌。

旅次湘沅有懷靈均

分拙多感激。久遊遵長塗。經過湘水源。懷古方踟蹰。舊稱楚靈均。此處殞忠軀。側聆故老言。遂得旌賢愚。名參君子場。行爲小人儒。騷文銜貞亮。體物情崎嶇。三黜有愠色。卽非賢哲模。五十爵高秩。謬膺從大夫。

曾襟積憂愁。容鬢復一作先彫枯。死爲不弔鬼。生作徧謗徒。吟澤潔其身。忠節寧見輸。懷沙滅其性。孝行焉能俱。且聞善稱君。一何善自殊。且聞過稱己。一何過不渝。悠哉風土人。角黍投川隅。相傳歷千祀。哀悼延八區。如今聖明朝。養育無羈孤。君臣逸雍熙。德化盈紛敷。巾車徇前侶。白日猶昆吾。寄君臣子心。戒此真良圖。

### 過彭澤

揚帆過彭澤。舟人訝歎息。不見種柳人。霜風空寂歷。

### 過分水嶺

山壯馬力短。路行石齒中。十步九舉轡。迴環失西東。溪水變爲雨。懸崖陰濛濛。客衣飄飆初。葛花零落風。

白日捨我沒。一作去。征途忽然窮。

### 分水嶺別夜示從弟寂一作示于孟叔

南中少平地。山水重疊生。別泉萬餘曲。迷舟獨難行。四際亂峯合。一眺千慮并。潺湲冬夏冷。光彩晝夜明。賞心難久勝。離腸忽自驚。古木搖霽色。高風動秋聲。一作古木解舊葉。迴風結秋聲。飲爾一樽酒。慰我百憂輕。嘉期何處定。

此晨堪寄情。

### 連州吟三章

春風朝夕起。吹綠日日深。試爲連州吟。淚下不可禁。連山何連連。連天碧岑崟。哀猿哭花死。子規裂客心。

蘭芷結新佩。瀟湘遺舊音。怨聲能剪絃。坐撫零落琴。  
羽翼不自有。相追力難任。唯憑方寸靈。獨夜萬里尋。  
方尋魂飄颻。南夢山嶠嶽。髣髴驚魍魎。悉窅聞楓林。  
正直被放者。鬼魅無所侵。賢人多安排。俗士多虛歆。  
孤懷吐明月。衆毀鑠黃金。願君保玄曜。壯志無自沉。  
朝亦連州吟。暮亦連州吟。連州果有信。一紙萬里心。  
開緘白雲斷。明月墮衣襟。南風嘶舜瑄。苦竹動猿音。  
萬里愁一色。瀟湘雨淫淫。兩劍忽相觸。雙蛟恣浮沉。  
鬪水正迴幹。倒流安可禁。空愁江海信。驚浪隔相尋。

旅行

楚水結冰薄。楚雲爲雨微。野梅參差發。旅榜逍遙歸。

紀贈

上河陽李大夫

上將秉神略。至兵無猛威。三軍當嚴冬。一撫勝重衣。  
霜劍奪衆景。夜星失長輝。蒼鷹獨立時。惡鳥不敢飛。  
武牢鎖天關。河橋紐地機。大將奚以安。守此稱者稀。  
貧士少顏色。貴門多輕肥。試登山岳高。方見草木微。  
山岳恩旣廣。草木心皆歸。

投贈張端公

君子量不極。胷吞百川流。嫉邪霜氣直。問俗春辭柔。  
日戶晝輝靜。月盃宵景幽。詠驚芙蓉發。笑激風飈秋。  
鸞步獨無侶。鶴音仍寡儔。幸沾分寸顧。散此千萬憂。

贈蘇州韋郎中使君

謝客吟一聲。霜落羣聽清。文含元氣柔。鼓動萬物輕。嘉木依性植。曲枝亦不生。塵埃徐庾詞。金玉曹劉名。章句作雅正。江山益鮮明。蘋萍一水草。菰蒲片池榮。曾是康樂詠。如今舉其英。顧惟菲薄質。亦願將此并。

上張徐州

爲水不入海。安得浮天波。爲木不在山。安得橫日柯。再來君子傍。始覺精義多。一作藝多大德唯一施。衆情自偏頗。至樂無一作變宮徵。至聲遺謳謠。願鼓空桑絃。永使萬物和。顧己誠拙訥。干名已蹉跎。獻詞唯在口。所欲無餘它。乍作支泉石。乍作翳松蘿。一不改方圓。破質爲琢磨。賤子本如此。大賢心若何。豈是無異途。異途難經過。

上包祭酒

岳岳冠蓋彥。英英文字雄。瓊音獨聽時。塵韻固不同。春雲生紙上。秋濤起胷中。時吟五君詠。再舉七子風。何幸松桂侶。見知勤苦功。願將黃鶴翅。一借飛雲空。

贈崔純亮

食薺腸亦苦。強歌聲無歡。出門卽有礙。誰謂天地寬。有礙非遐方。長安大道傍。小人智慮險。平地生太行。鏡破不改光。蘭死不改香。始知君子心。交久道益彰。君心與我懷。離別俱迴遑。譬如浸蘗泉。流苦已日長。忍泣目易哀。忍憂形易傷。項籍非不壯。賈生非不良。當其失意時。涕泗各沾裳。古人勸加飧。一作食此飧一作食

難自強。一飯九祝噎。一嗟十斷腸。況是兒女怨。怨氣凌彼蒼。彼蒼昔有知。白日下清霜。今朝始驚歎。一作呼  
碧落空茫茫。

贈文應上人

棲遲青山巔。高靜身所便。不踐有命草。但飲無聲泉。齋性空轉寂。學情深更專。經文開貝葉。衣製垂秋蓮。  
猷此俗人羣。暫來還却旋。

嚴河南

赤令風骨峭。語言清霜寒。不必用雄威。見者毛髮攢。我有赤令心。未得赤令官。終朝衡門下。忍志將筑彈。  
君從西省郎。正有東洛觀。洛民蕭條久。威恩憫撫難。苦竹聲嘯雪。夜齋聞千竿。詩人偶寄耳。聽苦心多端。  
多端落盃酒。酒中方得歡。隱士多隱酒。此言信難刊。取次令坊沽。舉止務在寬。何必紅燭嬌。始言清宴闌。  
丈夫莫矜莊。矜莊不中看。

贈李觀觀初登第

誰言形影親。燈滅影去身。誰言魚水歡。水竭魚枯一作鱗。昔爲同恨客。今爲獨笑人。捨予在泥轍。飄跡上  
雲津。臥木易成蠹。棄花難再春。何言對芳景。愁望極蕭晨。埋劍誰識氣。匣絃日生塵。願君語高風。爲余問  
蒼旻。

吳安西館贈從弟楚客

蒙籠楊柳館。中有南風生。風生今爲誰。湘客多遠情。孤枕楚水夢。獨帆楚江程。覺來殘恨深。一作心。尙與歸路并。玉匣正絃在。請君時一鳴。

贈章仇將軍

將軍不誇劍。才氣爲英雄。五岳拽力內。百川傾意中。本立誰敢拔。飛文自難窮。前時天地翻。已有扶正功。

贈道月上人

僧貌淨無點。僧衣寧綴華。尋常晝日行。不使身影斜。飯木煮松柏。坐山敷一作邀。雲霞。欲知禪隱高。緝薜爲袈裟。

杼情因上郎中二十二叔監察十五叔兼呈李益端公柳縝評事

方憑指下絃。寫出心中言。寸草賤子命。高山主人恩。遊邊風沙意。夢楚波濤魂。一日引別袂。九迴露淚痕。自悲何以然。在禮闕晨昏。名利時轉甚。是非宵亦喧。浮情少定主。百慮隨世翻。舉此胷臆恨。幸從賢哲論。明明三飛鸞。一作步兵。與雙鸞。照物如朝暉。

贈城郭道士

望裏失却山。聽中遺却泉。松枝休策雲。藥囊翻貯錢。曾依青桂鄰。學得白雲絃。別別意未迴。世上爲隱仙。

桐廬山中贈李明府

靜境無濁氛。清雨零碧雲。千山不隱響。一葉動亦聞。卽此佳志士。精微誰相羣。欲識楚一作化。章句。袖中蘭

芭薰。

獻漢南樊尙書

天下昔崩亂。大君識賢臣。衆木盡搖落。始見竹色真。兵勢走山岳。陽光潛埃塵。心開玄女符。面縛清波人。異俗旣從化。澆風亦歸淳。自公理斯郡。寒谷皆變春。旗響卷赤電。劍鋒匣青鱗。如何嵩高氣。作鎮楚水濱。雲鏡忽開霽。一作景。孤光射無垠。乃知尋常鑒。照影不照神。

贈轉運陸中丞

掌運職旣大。摧邪名更雄。鵬飛簸曲雲。鷲怒生直風。投彼霜雪令。翦除荆棘叢。楚倉傾向西。吳米發一作登。自東帆影咽。河口車聲聳。關中堯知才。策高人喜道路通。皆驚內史力。繼得鄴侯功。萊子員爲少。相如未免窮。衣花野茵蒼。書葉山梧桐。不是宗匠心。誰憐久栖蓬。

贈萬年陸郎中

天子憂劇縣。寄深華省郎。紛紛風響珮。墊墊劍開霜。舊事笑堆案。新聲唯雅章。誰言百里才。終作橫天梁。江鴻恥承眷。雲津未能翔。徘徊塵俗中。短翥無輝光。

擢第後東歸書懷獻坐主呂侍郎

昔歲辭親淚。今爲戀恩泣。去住情難並。別離景易戢。天矯大空鱗。曾爲小泉蟄。幽意獨沉時。震雷忽相及。神行旣不宰。直致非所執。至運本遺功。輕生各一作苦。自立。大君思此化。良佐自然集。寶鏡無私光。時文有

新習慈親誠志就。賤子歸情急。擢第謝靈臺。牽衣一作名出皇邑。行襟海日曙。逸抱江風入。兼葭得波浪。芙蓉紅岸濕。雲寺勢動搖。山鐘韻噓吸。舊遊期再踐。懸水得重挹。松蘿雖可居。青紫終當拾。

古意贈梁肅補闕

曲木忌日影。讒人畏賢明。自然照燭間。不受邪佞輕。不有百鍊火。孰知寸金精。金鉛正同在。一作在鑪。願分精與麤。

贈黔府王中丞楚

舊說天下山。半在黔中青。又聞天下泉。半落黔中鳴。山水千萬遶。中有君子行。儒風一以扇。汙俗心皆平。我願中國春。化從異方生。昔爲陰草毒。今爲陽華英。嘉實綴綠蔓。涼湍瀉清聲。逍遙物景勝。視聽空曠并。困驥猶在轅。沉珠尙隱精。路遐莫及盼。泥污日已盈。歲宴將何從。落葉甘自輕。

上達溪舍人

北山少日月。草木苦風霜。貧士在重坎。食梅有酸腸。萬俗皆走圓。一作心猶學方。常恐衆毀至。春葉成秋黃。大賢秉高鑒。公燭無私光。暗室曉未及。幽吟涕空行。

贈主人

斗水瀉大海。不如瀉枯池。分明賢達交。豈顧豪華兒。海有不足流。豪有不足資。枯鱗易爲水。貧士易爲施。幸覩君子席。會將幽賤期。側聞清風議。如飲黃金卮。此道與日月。同光無盡時。

贈建業契公

師住青山寺。清華常遶身。雖然到城郭。衣上不棲塵。

獻襄陽于大夫

襄陽青山郭。漢江白銅堤。謝公領茲郡。山水無塵泥。鐵馬萬霜雪。絳旗千虹蜺。風漪參差泛。石板重疊躋。舊淚不復墮。新歡居然齊。還耕竟原野。歸老相扶鸞。物色增曖曖。寒芳更萋萋。淵清有遐略。高躅無近蹊。  
一作衆賦無暴掠與歌有安綏 卽此富蒼翠。自然引翔棲。曩遊常抱憶。夙好今尙睽。願言從逸轡。暇日凌清溪。

贈鄭夫子魴

天地入胷臆。吁嗟生風雷。文章得其微。物象由我裁。宋玉逞大句。李白飛狂才。苟非聖賢心。孰與造化該。勉矣鄭夫子。驪珠今始胎。

大隱詠三首

崔從事郎以直隲職官一作

古人留清風。千載遙贈君。破松見貞心。裂竹看直文。殘月色不改。高賢德常新。家懷詩書富。宅抱草木貧。安得一蹄泉。來化千尺鱗。含意永不語。釣璜幽水濱。

章仇將軍良棄功守貧

飲君江海心。詎一作能辨淺深。揖君山岳德。誰能齊嶽岑。東海精爲月。西岳氣凝金。進則萬景晝。一作退則

羣物陰。我欲薦此言。天門峻沉沉。風颺亦感激。爲我颺颺吟。

趙記室倅在職無事

卑靜身後老。高動物先摧。方圓水任器。剛勁木成灰。大道母羣物。達人腹衆才。時吟堯舜篇。心向無爲開。彼隱山萬曲。我隱酒一杯。公庭何所有。日日清風來。

贈韓郎中愈二首

何以定一作交契。贈君高山石。何以保貞堅。贈君青松色。貧居過此外。無可相彩飾。聞君碩鼠詩。吟之淚

空滴。

碩鼠既穿墉。又嚙機上絲。穿墉有閑餘。一作上。嚙絲無餘衣。朝吟枯桑柘。暮泣穿杼機。豈是無巧妙。絲斷將

何施。衆人上肥華。忠士多饑羸。願君保此節。一作願保此真節天意當察微。右二詩一本作一詩

前日遠別離。今日生白髮。欲知萬里情。曉臥半牀月。常恐百蟲秋。使我芳草歇。一本無此一篇

戲贈无本二首

長安秋聲乾。木葉相號悲。瘦僧臥冰凌。一作嘲朔。詠含金痍。金痍非戰痕。峭病方在茲。詩骨聳東野。詩濤湧

退之。有時踉蹌行。人驚鶴阿師。可惜李杜死。不見此狂癡。

燕僧聳聽詞。袈裟喜新翻。北岳厭利殺。玄功生微言。天高亦可飛。海廣亦可源。文章查無底。斷掘誰能根。夢靈髣髴到。匠我方與論。拾月鯨口邊。何人免爲吞。燕僧擺造化。萬有隨手奔。補綴雜霞衣。笑傲諸貴門。

將明文在身亦爾一作示道所存朔雪凝別句朔風飄征魂再期嵩少遊一訪蓬蘿村春草步步綠春山日  
日暄遙鷺相應吟晚聽恐不繁相思塞心骨高逸難攀援



# 孟東野詩集卷第七

## 懷寄

### 寄張籍

夜鏡不照物。朝光何時昇。黯然秋思來。一作暗然走入志士膺。志士惜時逝。一宵三四興。清漢徒自朗。濁河終無澄。舊愛忽已遠。新愁坐相凌。君其隱壯懷。我亦逃名稱。古人貴從晦。君子忌黨朋。傾敗生所競。保全歸矜矜。一作苦僧浮雲何當來。潛虬會飛騰。

### 憶周秀才素上人時聞各在一方

東西分我情。魂夢安能定。野客雲作心。高僧月爲性。浮雲自高閑。明月常空淨。衣敝得古風。居山無俗病。吟聽碧雲語。手把青松柄。羨爾欲寄書。飛禽杳難倩。

### 舟中喜遇從叔簡別後寄上時從叔初擢第歸江南郊不從行

一意兩片雲。暫合還却分。南雲乘慶歸。北雲與誰羣。寄聲千里風。相喚聞不聞。

### 懷南岳隱士二首

見說祝融峯。擎天勢似騰。藏千尋布水。出十八高僧。古路無人跡。新霞吐石稜。終居將爾叟。一一共余登。千峯映碧湘。眞叟此中藏。飯不煮石喫。眉應似髮長。楓檉搯酒甕。鶴虱落琴床。強效忘機者。斯人尙未忘。

春夜憶蕭子真

半夜不成寐。燈盡又無月。獨向堦前立。子規啼不歇。況我有金蘭。忽爾為胡越。爭得明鏡中。久長無白髮。

寄院中諸公

奕奕秋水傍。駸駸綠雲蹄。月仙有高曜。靈鳳無卑棲。翠色遶雲谷。碧華凝句溪。竹林遞歷覽。雲寺行攀躋。冠豸猶屈蠖。匣龍期剗犀。千山驚月曉。百里聞霜聲。戎府多秀異。謝公期相攜。因之仰羣彥。養拙固難齊。

寄洛州李大夫

自從薊師反。中國事紛紛。儒道一失所。賢人多在軍。鳥巢憂迸射。鹿耳駭驚聞。劍折唯恐匣。一作怨匣弓貧不讓勳。方知省事將。動必謝前羣。鶴陣常先罷。魚符最晚分。步閑洛水曲。笑激太行雲。詩叟未相識。竹兒爭見君。殷勤越談說。記盡士風文。一作風

寄盧虔使君

霜露再相換。遊人猶未歸。歲新月改色。客久線斷衣。有鶴冰在翅。竟久力難飛。千家舊素沼。昨日生綠輝。春色若不一作可借。為君步芳菲。

寄崔純亮

百川有餘水。大海無滿波。器量各相懸。賢愚不同科。羣辯有姿語。衆歡無一作有。行歌唯餘洛陽子。鬱鬱恨常多。時讀過秦篇。為君涕滂沱。

汴州離亂後憶韓愈李翱

會合一時哭。別離三斷腸。殘花不待風。春盡各飛揚。權去收不得。悲來難自防。孤門清館夜。獨臥明月床。忠直血白刃。道路聲蒼黃。食恩三千士。一旦爲豺狼。海島士皆直。夷門士非良。人心旣不類。天道亦反常。自殺與彼一作殺。未知何者臧。

寄張籍

未見天子面。不如雙盲人。賈生對文帝。終日猶悲辛。夫子亦如盲。所以空泣麟。有時獨齋心。髣髴夢稱臣。夢中稱臣言。覺後真埃塵。東京有眼富。不如西京無眼貧。西京無眼猶有耳。隔墻時聞天子車。一有聲之字麟麟麟。車聲輾冰玉。南郊壇上禮百神。西明寺後窮瞎張。太祝縱爾有眼誰爾珍。天子只尺不得見。不如閉眼且養真。

寄義興小女子

江南莊宅淺。所固唯疎籬。小女未解行。酒弟一作病叔老更癡。家中多吳語。教爾遙可知。山怪夜動門。水妖時弄池。所憂癡酒腸。不解委曲辭。漁妾性崛強。耕童手皴皴。想茲爲襁褓。如鳥拾柴枝。我詠元魯山。曾臆流甘滋。終當學自乳。起坐常相隨。

憶江南弟

白首眼垂血。望爾唯夢中。筋力強起時。魂魄猶是東。眼光寄明星。起來東望空。望空不見人。江海波無窮。

衰老無氣力。呼叫不成風。子然憶憶言。落地何由通。常師共被教。竟作生離翁。生離不可訴。上天口曾聰。未忍對松柏。自鞭殘朽躬。自鞭亦何益。口教非所崇。努力拄杖來。餘活與爾同。不然死後恥。遺死亦有終。

宿空姪院寄澹公

夜坐冷竹聲。二三高人語。燈窻看律鈔。小師別為侶。雪簷晴滴滴。茗椀華舉舉。磬音多風飈。聲韻聞江楚。官街不相隔。詩思空愁予。明日策杖歸。去住兩延佇。

寄陝府鄧

一作給事

陝城臨大道。館宇屹幾鮮。候謁隨芳一作方。語鏗詞芬蜀牋。從來鏡目下。見盡道心前。自謂古詩量。異一作冀

將新學偏。戇人年六十。每月請二千。不敢等閑用。願為長壽錢。非關亦潔爾。將以救羸然。孤省癡皎皎。默

吟寫綿綿。病書憑晝日。驛信寄宵鞭。疾訴將何諭。肆鱗今倒懸。塵鯉見枯浪。土鬣忠乾泉。感感無緒蕩。愁

愁作口邊。貞元文祭酒。即陽公。比謹學韋玄。滿坐無風雜。當朝雅獨全。見知囑徐孺。即徐端公。賞句類陶淵。一顧生

鴻羽。再言將鶴翮。宣揚隘車馬。若子湊駢闐。曾是此同睽。至今應賜憐。磨墨零落淚。楷字貢仁賢。

送諫議十六叔至孝義渡後奉寄

曉渡明鏡中。霞衣相飄颻。浪鳧驚亦雙。蓬客將誰僚。別飲孤易醒。離憂壯難銷。文清雖無敵。儒貴不敢驕。江吏捧紫泥。海旗翦紅蕉。分明太守禮。跨躡毗陵橋。伊洛去未迴。遐矚空寂寥。

至孝義渡寄鄭軍事唐二十五

咫尺不得見。心中空嗟嗟。官街泥水深。下脚道路斜。嵩少玉峻峻。伊雒碧華華。岸亭當四迥。詩老獨一家。消叟何所如。鄭食唯有些。何當來說事。爲君開流霞。

### 酬答

#### 答友人

白日照清水。淺深無隱姿。君子業高文。懷抱多正思。砥行碧山石。結交青松枝。碧山無轉易。青松難傾移。落落出俗韻。琅琅大雅詞。自非隨氏掌。明月安能持。千里不可倒。一返無近期。一作一別無回期。如何非意中。良覲忽在茲。道語必疎淡。儒風易凌遲。願存堅貞節。勿爲霜霰欺。

#### 酬友人見寄新文

爲客棲未定。況當玄月中。繁雲翳碧霄。落雪和清風。郊陌絕行人。原隰多飛蓬。耕牛返村巷。野鳥依房櫳。我無飢凍憂。身託蓮花宮。安閑賴禪伯。復得疏塵蒙。覽君郢曲文。詞彩何冲融。謳吟不能已。頓覺形神空。

#### 答韓愈李觀別因獻張徐州

富別愁在顏。貧別愁銷骨。懶磨舊銅鏡。畏見新白髮。古樹春無花。子規啼有血。離絃不堪聽。一聽四五絕。世途非一險。俗慮有千結。有客步大方。驅車獨迷轍。故人韓與李。逸翰雙皎潔。哀我摧折歸。贈詞縱橫設。徐方國東樞。元戎天下傑。禰生投敕遊。王粲吟詩謁。高情無遺照。朗抱開曉月。有土不埋冤。有讎皆爲雪。願爲直草木。永向君地列。願爲古琴瑟。永向君聽發。欲識丈夫心。會將孤劍說。

答書上人止讒作

烈烈鸞鷲吟。鏗鏗琅玕音。梟摧明月嘯。鶴起清風心。渭水不可渾。涇流徒相侵。俗侶唱桃葉。隱仙一作鳴桂琴。子野真遺却。浮淺藏淵深。

答姚怱見寄

日月不同光。晝夜各有宜。賢哲不苟合。出處亦待時。而我獨迷見。意求異士知。如將舞鶴管。誤向驚鳧吹。大雅難具陳。正聲易漂淪。君有丈夫淚。泣人不泣身。行吟楚山下。一作義淚沾衣巾。

答郭郎中

松栢死不變。千年色青青。志士貧更堅。守道無異營。每彈瀟湘瑟。獨抱風波聲。中有失意吟。知者淚滿纓。何以報知者。永存堅與貞。

答盧虔故園見寄

訪舊無一人。獨歸清雒春。花間哭聲死。水見別容新。亂後故鄉宅。多爲行路塵。因悲楚左右。謗玉不知珉。汝墳蒙從弟。楚材見贈時。郊將入秦楚。材適楚。

朝爲主人心。夕作行客吟。汝水忽淒咽。汝風流苦音。北闕秦門高。南路山。一作楚石深。分淚洒白日。離腸繞青岑。何以寄遠懷。一作黃鶴能相尋。

同從叔簡酬盧殷少府

梅尉吟楚聲。竹風爲淒清。深虛冰在性。高潔雲入情。借水洗閑貌。寄蕉書逸名。羞將片石文。鬪此雙瓊英。

酬李侍御書記秋夕雨中病假見寄

秋風遶衰柳。遠客聞雨聲。重茲阻良夕。孤坐唯積誠。果枉移疾詠。中含嘉慮明。洗滌煩濁盡。視聽昭曠生。未覺衾枕倦。久爲章奏嬰。達入不寶一作保藥。所保在閑情。

答盧仝

楚屈入水死。詩死踏雪僵。直氣苟有存。死亦何所妨。日劈高查牙。清稜含冰漿。前古後古冰。與山氣勢強。閃怪千石形。異狀安可量。有時春鏡破。百道聲飛揚。潛仙不足言。朗客無隱腸。爲君傾海宇。日夕多文章。天下豈無緣。此山雪昂藏。煩君前致詞。哀我老更狂。狂歌不及狂。歌聲緣鳳凰。鳳兮何當來。消我孤直瘡。君文真鳳聲。宣隘滿鏗鏘。洛友零落盡。逮茲悲重傷。獨自奮異骨。將騎白一作玉角翔。再三勸莫行。寒氣有刀槍。仰慙君子多。慎勿作芬芳。

奉報翰林張舍人見遺之詩

百蟲笑秋律。清削月夜聞。曉稜視聽微。風翦葉已紛。君子鑒大雅。老人非俊羣。收拾古所棄。俛仰補空文。孤韻恥春俗。餘響逸零霧。自然蹈終南。滌暑凌寒氛。巖霰不知午。稠澌鎮含曛。曾是醒古醉。所以多隱淪。江調樂之遠。溪謠生徒新。衆蘊有餘採。寒泉空哀呻。南謝竟莫至。北宋當時珍。蹟靈各自異。酌酒一作聖誰能均。昔詠多寫諷。今詞詎無因。品松位何高。翠宮沒荒榛。苔趾識宏製。沙濼游崩津。忽吟陶淵明。此卽羲

皇人心放出天地。形拘在風塵。前賢素行階。夙嗜青山勤。達士立明鏡。朗言爲近臣。將期律萬有。傾倒甄無垠。鸞鷲應蟋蟀。絲毫意皆申。況於三千章。哀叩不爲神。

送別上

送從弟郢東歸

爾去東南夜。我無西北夢。誰言貧別易。貧別愁更重。曉色奪明月。征人逐羣動。秋風楚濤高。旅榜將誰共。

山中送從叔簡赴舉

石根百尺杉。山眼一片泉。倚一作停。之道氣高。飲之詩思鮮。於此逍遙場。忽奏別離絃。却笑薜蘿子。不同鳴

躍年。

送別崔寅亮下第

大地唯一氣。用之自偏頗。憂人成苦吟。達士爲高歌。君子識不淺。桂枝幽更多。歲晏期攀折。時歸且婆娑。素質如削。一作荆。玉清詞若傾。一作天。河虬龍未化時。魚鱉同一波。去矣當自適。故卿饒薜蘿。

大梁送柳淳先入關

青山輾爲塵。白日無閑人。自古推高車。爭利西入秦。王門與侯門。待富不待貧。空攜一束書。去去誰相親。

一云空齎一束

書獨去將誰親。

送無懷道士遊富春山水一作送別吳逸士歸山

造化絕一作見。高處富春獨多觀。山濃翠滴灑一作樂。水折珠摧殘。溪鏡不隱髮。樹衣長遇一作禦。寒風猿虛空飛。月狷叫嘯酸。信此神仙路一作樂。豈爲時俗安。煮金陰陽火一作芙蓉水。因怪星宿壇。花發我一作或。未識玉生忽。藜攢蓬萊浮蕩漾。非道相從難。

送溫初下第

日落濁水中。夜光誰能分。高懷無近趣。清抱多遠聞。欲識丈夫志。心藏孤岳雲。長安風塵別。咫尺不見君。

送盧虔端公守復州

師曠聽羣木。自然識孤桐。正聲逢知音。願出大朴中。知音不韻俗。獨立占一作上。古風忽挂觸邪冠。逮逐南飛鴻。肅肅太守章。明明華轂熊。商山無平路。楚水有驚濤。日月千里外。光陰難載同。新愁徒自積。良會何由通。

送任齊二秀才自洞庭遊宣城

任載齊古井序

文章者。賢人之心氣也。心氣樂則文章正。心氣非則文章不正。當正而不正者。心氣之僞也。賢與僞見於文章。一直之詞。衰代多禍。賢無曲詞。文章之曲直。不由於心氣。心氣之悲樂。亦不由於賢人。由於時。故今宣州多君子。閑暇而寬。文章之曲直。纖微悉而備舉。洞庭二客。勉而客去之。鼓其風波之詞。吾知夫樂。莫是行也。遂爲詩曰。洞庭非人境。道路行虛空。二客月中下。一帆天外風。魚龍波五色。金碧樹千叢。閃怪如可懼。在誠無不通。扣奇驚浩淼。採異訪穹崇。物表積高韻。人間訪仙公。宣城文雅地。謝守聲問融。證玉易爲

力辨珉誰不同。從茲阮籍淚。且免泣途窮。

送曉公歸庭山 一作歸

一作歸

庭山 一作柳庭 何崎嶇。寺路緣翠微。秋霽山盡出。日落人獨歸。雲生高高步。泉洒田田衣。枯巢無還羽。新木有爭飛。茲焉不可繼。夢寐空清輝。

送豆盧策歸別墅

短松鶴不巢。高石雲不始。 一作始 栖君今 一作為 瀟湘去。意 一作性 與雲鶴齊。力買奇險地。手開清淺溪。身披薜荔衣。

一作薜蘿

山陟莓苔梯。一卷冰雪文。避俗常自攜。

送清遠上人歸楚山舊寺

一作國清上人游蘇

波中出吳境。霞際登楚岑。水寺一別來。雲蘿三改陰。詩誇碧雲句。道證青蓮心。應笑泛萍者。 一云應憐萍泛者 不知松隱深。

山中送從叔簡

莫以手中瓊。言邀世上名。莫以山中迹。久向人間行。松柏有霜操。風泉無俗聲。應憐枯朽質。驚此別離情。

送蕭鍊師入四明山

閑於獨鶴心。大於高松年。迥出萬物表。高棲四明顛。千尋直裂峯。百尺倒瀉泉。絳雪為我飯。白雲為我田。

靜言不語 一作俗 靈蹤時步天。

# 孟東野詩集卷第八

## 送別下

感別送從叔校書簡再登科東歸

長安車馬道。高柳一作柳結浮陰。下有名利人。一人千萬心。黃鵠多遠勢。滄溟無近潯。怡怡靜退姿。泠泠思歸吟。菱唱忽生聽。芸書迴望深。清風散言笑。餘花綴衣襟。獨恨魚鳥別。一飛將一沉。

## 送玄亮師

蘭泉滌我襟。杉月棲我心。茗啜一作味綠淨花。經誦清桑音。何處笑爲別。淡情愁不侵。

## 送李尊師玄

口誦碧簡文。身是青霞君。頭冠兩片月。肩一作身披一條雲。松骨輕自飛。鶴心高不羣。

## 同晝上人送郭一作郭秀才江南尋兄弟

地一作池上春色生。眼前詩彩明。手攜片寶月。言是高僧名。溪轉萬曲心。一作石水流千里聲。飛鳴向誰去。江

## 鴻弟與兄

春日同韋郎中使君送鄒儒立少府扶持赴雲陽

離思着百草。絲絲生無窮。側聞畿甸秀。三振詞策雄。太守不韻俗。諸生皆變風。郡齋敞西清。楚瑟驚南鴻。

海畔帝一作高城望雲陽天色中。酒酣正芳景。詩綴新碧叢。服綵老萊並。侍車江革同。過隋柳顛顛。入洛花蒙籠。高步詎留足。前程在層空。獨慙病鶴羽。飛送力難崇。

送從叔校書簡南歸一作東游

長安別離道。宛在東城隅。寒草根未死。愁人心已枯。促促水上景。遙遙天際途。生隨昏曉中。皆被日月驅。北騎達一作驥遠山岳。南帆指江湖。高蹤一超越。千里在須臾。

送韓愈從軍

志士感恩起。變衣非變性。親賓改舊觀。僮僕生新敬。坐作羣書吟。行爲孤劍詠。始知出處心。不失平生正。淒淒天地秋。凜凜軍馬令。驛塵時一飛。物色極四靜。王師既不戰。廟略在無競。王粲有所依。元瑜初應命。一章喻檄明。百萬心氣定。今朝旌鼓前。笑別丈夫盛。

同第郎中使君送河南裴文學

河南有歸客。江風繞行襟。送君無塵聽。舞鶴清瑟音。菱蔓綴楚棹。日華正嵩岑。如何謝文學。還起會雲一作長吟。

送李翺習之

習之勢翩翩。東南去遙遙。贈一作寄君雙履足。一爲上臯橋。臯橋路透迤。碧水清風飄。新秋折藕花。應對吳語嬌。千巷分淥波。四門生早潮。湖榜輕馬裏。酒旗高寥寥。小時履齒痕。有處應未銷。舊憶如霧星。悅見於

夢消。言之燒人心。事去不可招。獨孤宅前曲。筌篲醉中謠。壯年俱悠悠。逮茲各焦焦。執手復執手。唯道無  
枯凋。

送丹霞子阮芳顏上人歸山

松色不肯秋。玉性不可柔。登山須正路。飲水須直流。倩鶴附書信。索雲作衣裳。仙村莫道遠。枉策招交遊。

送從舅端適楚地

歸情似泛空。飄蕩楚波中。羽扇掃輕汗。布帆篩細風。江花折菡萏。岸影泊梧桐。元舅唱離別。賤生愁不窮。

送盧汀侍御歸天德幕

仲宣領騎射。結束皆少年。匹馬黃河岸。射鵬清霜天。旌旗防日北。道路上雲巔。古雪無銷鑠。新冰有堆填。

清溪徒聳峭。白壁自招賢。豈比重思者。閉門方獨全。

送草書獻上人歸廬山

狂僧不爲酒。狂筆自通天。將書雲霞片。直至清明巔。手中飛黑電。象外瀉玄泉。萬物隨指顧。三光爲迴旋。

驟書雲霧鬣。洗硯山晴鮮。忽怒畫地虺。噴然生風煙。江人願停筆。驚浪恐傾船。

和薛先輩送獨孤秀才上都赴嘉會得青字

秦雲攀窈窕。楚桂舉芳馨。五色豈徒爾。萬枝皆有靈。仙謠天上貴。林詠雪中青。持此一爲贈。送君翔杳冥。

送崔爽之湖南

江與湖相通。一水洗高空。定知一日帆。使得一作千里風。雪唱與誰知。俗情多不通。何當逸一作逸翮縱。飛一作逸起泥沙中。

送超上人歸天台

天台山最高。動躡赤一作城霞。何以靜雙目。掃山除妄花。何以潔其性。一作鑿瀘泉去泥沙。靈境物皆直。萬松無一斜。月中見心近。雲外將世賒。山獸護方丈。山猿捧袈裟。遺身獨得身。笑我牽名華。

同李益崔放送王鍊師還樓觀兼為羣公先營山居

十一作年白雲士。一卷紫芝書。來結崆峒侶。還期縹緲居。霞冠遺彩翠。月一作帔上空虛。寄謝泉壽水。清冷閑有餘。

張徐州席送岑秀才

振振芝蘭步。昇自君子堂。泠泠松桂吟。生自楚客腸。羈鳥無定棲。驚蓬在它鄉。去茲門館閑。卽彼道路長。雨餘山川淨。麥熟草木涼。楚淚滴章句。京塵染衣裳。贈君無餘它。久要不可忘。

送黃構擢第後歸江南

澹澹滄海氣。結成黃香才。幼齡思奮飛。弱冠遊靈臺。一鶚顧喬木。衆禽不敢猜。一驥騁長衢。衆獸不敢陪。遂得會風雨。感通如雲雷。至矣小宗伯。確乎心不回。能令幽靜人。聲實喧九垓。却憶江南道。祖筵花裏開。春風不能別。別罷空徘徊。

送道士

十年山上行。山上無遺蹤。一日人間游。六合人皆逢。自有意中侶。白寒徒相從。

送孟寂赴舉

烈士不憂身。爲君吟苦辛。男兒久失意。寶劍亦生塵。浮俗官是貴。君子道所珍。況是聖明立。豈乏證玉臣。濁水無白日。清流鑒蒼旻。賢愚皎然別。結交常有因。

同溧陽宰送孫秀才

廢瑟難爲絃。南風難爲歌。幽幽拙疾中。忽忽浮夢多。清韻始嘯侶。雅言相與和。訟閑每往招。祖送柰若何。牽若強爲贈。邦邑光峩峩。

溧陽唐興寺觀薔薇花同諸公餞陳明府

忽驚紅琉璃。千艷萬艷開。佛火不燒物。淨香空徘徊。花下印文字。林間詠觴盃。羣官餞宰官。此地車馬來。

送柳淳

青山臨黃河。下有長安道。世上名利人。相逢不知老。

送殷秀才南遊

詩句臨一作滿離袂。酒花薰別顏。水程千里外。岸泊幾宵間。風葉亂辭木。雪猿清叫山。南中多一作高古事。詠遍始應還。

送青陽上人遊越

秋風吹白髮。微宦自蕭索。江僧何用歎。溪縣饒寂寞。楚思物皆清。越山勝非薄。時看鏡中月。獨向衣上落。多謝入冥鴻。笑予在籠鶴。

奉同朝賢送新羅使

森森望遠國。一萍秋海中。恩傳日月外。夢在波濤東。浪興豁胷臆。泛程舟虛空。既茲吟仗信。亦以難私躬。實怪賞不足。異鮮悅多叢。安危所繫重。征役誰能窮。彼俗媚文史。聖朝富才雄。送行數百首。各以鏗奇工。冗隸竊抽韻。孤屬思將同。

留弟郢不得送之江南

剛有下水船。白日留不得。老人獨自歸。苦淚滿眼黑。

送陸暢歸湖州因憑題

一作 吊 故人皎然塔陸羽墳

渺渺雪寺前。白蘋多清風。昔游詩會滿。今游詩會空。孤詠玉淒惻。遠思景蒙籠。杼山博塔禪。竟陵廣一作 攢宵翁。饒彼草木聲。髣髴聞餘聰。因君寄數句。遍爲書其藁。追吟當時說。來者實不窮。江調難再得。京塵徒滿躬。送君溪鴛鴦。彩色雙飛東。東多高靜鄉。芳宅冬亦崇。手自擷甘旨。供養歡冲融。待我遂前心。收拾使有終。不然洛岸亭。歸死爲大同。

送淡公十二首

燕本冰雪骨。一作冰

雪操

越淡蓮花風。五言雙寶刀。聯響高飛鴻。翰苑錢舍人。詩韻鏗雷公。識本末識淡。仰詠

嗟無窮。清恨生物表。朗玉傾夢中。常於冷竹坐。相語道意冲。嵩洛興不薄。稽江事難同。明年若不來。我作黃蒿翁。何以兀其心。爲君學虛空。

坐愛青草上。意含滄海濱。渺渺獨見水。悠悠不問人。鏡浪洗手綠。剡花入心春。雖然防外觸。無奈饒衣新。行當譯文字。慰此吟殷勤。

銅斗飲江酒。手拍銅斗歌。儂是拍浪兒。飲則拜浪婆。脚踏小船頭。獨速舞短蓑。笑伊漁陽操。空恃文章多。閑倚青竹竿。白日奈我何。

短篴不怕雨。白鷺相爭飛。短楫畫菰蒲。鬪作豪橫歸。笑伊水健兒。浪戰求光輝。不如竹枝弓。射鴨無是非。射鴨復射鴨。鴨驚菰蒲頭。鴛鴦亦零落。彩色難相求。儂是清浪兒。每踏清浪游。笑伊鄉貢郎。踏土稱風流。如何巾角翁。至死不裹頭。

師得天文章。所以相知懷。數年伊雒同。一旦江湖乖。江湖有故莊。小女啼啾啾。我憂未相識。乳養難和諧。幸以片佛衣。誘之令看齋。齋中百福言。催促西歸來。

伊洛氣味薄。江湖文章多。坐緣江湖岸。意識

一作織

鮮明波。銅斗短篴行。新章其奈何。茲焉激切句。非是等

閑歌。製

一作擊

之附驛迴。勿使餘風訛。都城第一寺。昭成屹嵯峨。爲師書廣壁。仰詠時經過。徘徊相思心。老

淚雙滂沱。

江南寺中邑。一作□□平地生勝山。開元吳語僧。律韻高且閑。妙樂溪岸平。桂榜復往一作還。樹石相鬪生。紅

綠客異顏。風味找遙憶。新奇師獨攀。

報恩兼報德。寺與山爭鮮。一作先。橙橘金蓋檻。竹蕉綠凝禪。經童音韻細。風磬清□。離腸繞師足。舊憶隨

路延。不知幾千尺。至死方綿綿。

鄉在越鏡中。分明見歸心。鏡芳步步綠。鏡水日日深。異刹碧天上。古香清桂岑。朗約徒在昔。章句忽盈今。

幸因西飛葉。書作東風吟。落我病枕上。慰此浮恨侵。

牽師袈裟別。師斷袈裟歸。問師何苦去。感吃言語稀。意恐被詩餓。欲住將底依。盧殷劉言史。餓死君已噫。

不忍見別君。哭君他是非。

詩人苦爲詩。不如脫空飛。一生空鷲氣。非諫復非譏。脫枯掛寒枝。棄如一唾微。一步一步乞。半片半片衣。

倚詩爲活計。從古多無肥。詩飢老不怨。勞師淚霏霏。

送魏端公入朝

東洛尙淹翫。西京足芳妍。大賓威儀肅。上客冠劍鮮。豈惟空戀闕。亦以將朝天。局促塵末吏。幽老病中絃。徒懷青雲價。忽至白髮年。何當補風教。爲薦三百篇。

送盧郎中汀

洛水春渡闊。別離心悠悠。一生空吟詩。不覺成白頭。向事每計較。與山實綢繆。太華天上開。其下車轍流。

縣街無塵土。過客多淹留。坐飲孤驛酒。行思獨山遊。逸關嵐氣明。照渭空漪浮。玉珂擺新歡。聲與鸞鳳儔。朝謁大家事。唯余去無由。

送鄭僕射出節山南

一作酬鄭興元僕射招

國老出爲將。紅旗入青山。再招門下生。結束餘病孱。自笑騎馬醜。強從驅馳間。顧顧一作傾傾磨天路。裊裊鏡下顏。文魄既飛越。宦情唯等閑。羨他白面少。多是清朝班。惜命非所報。慎行誠獨艱。悠悠去住心。兩說何能刪。

別妻家

芙蓉濕曉露。秋別南浦中。鴛鴦卷

一作有

新贈。遙戀東牀空。碧水不息浪。清溪易生風。參差坐

一作路

成阻。飄颻

去一作恨

無窮。孤雲目雖斷。明月心相通。私情詎銷鑠。積芳在春藂。

贈姚怱別

美人廢琴瑟。不是無巧彈。聞君郢中唱。始覺知音難。驚蓬無還根。馳水多分瀾。倦客馱出門。疲馬思解鞍。何以寫此口。贈君握中丹。

贈竟陵盧使君虔別

赤日千里火。火中行子心。孰不苦焦灼。所行爲貧侵。山木豈無涼。猛獸蹲清陰。歸人憶一作懷平坦。別路多

嶮嶽賴得竟陵守。時聞建安吟。贈別折楚芳。楚芳一作芳色搖衣襟。

與韓愈李翱張籍話別

朱絃奏離別。華燈少光輝。物色豈知異。人心故將違。客程殊未已。歲華忽然已。一作微秋桐故葉下。寒露新鴈飛。遠遊起重恨。送人念先歸。夜集類飢鳥。晨光失相依。馬跡遶川水。鴈書還一作妻泣守。閨闈常恐親朋阻。獨行知慮非。

監察十五叔東齋招李益端公會別

欲知惜別離。瀉水還清池。此地有君子。芳蘭步葳蕤。手掇一作綴雜英一作彩。珮意搖春夜一作夢。思莫作遶山雲。循環無定期。

汴州別韓愈

不飲濁水瀾。空滯此汴河。坐見遶岸冰。一作水盡為還海波。四時不在家。弊服斷線多。遠客獨顛顛。春英落一作各。婆娑汴水饒。曲流野桑無直柯。但為君子心。歎息一作飲之終匪他。

贈別殷山人說易後歸幽墅

夫子說天地。若與靈龜言。幽幽人不知。一一予所敦。秋月吐白夜。涼風韻清源。旁通忽已遠。神感寂不喧。一悟祛萬結。夕懷傾朝煩。旅轉無停波。別馬嘶去轅。殷勤荒草土。會有知己論。

壽安西渡奉別鄭相公二首

洛河向西道。石波橫磷磷。清風送君子。車遠無還塵。春別亦蕭索。況茲冰霜晨。零落景易入。鬱抑抱難申。百宵華燈宴。一旦星散人。歲去絃吐箭。憂來蠶抽綸。綿綿無窮事。各各馳遶身。徘徊黃縹緲。倏忽春霜賓。相爲物表物。永謝區中姻。日嗟來教士。仰望無由親。

東都清風減。君子西歸朝。獨抱歲晏恨。泗吟不成謠。貴遊意多味。賤別情易消。迴鴈憶前叫。浪鳧念後漂。

悠悠孤飛景。聳聳銜霜條。昧趣多滯澀。

一作趾。

懶明寡新僚。病深理方晤。悔至心自燒。寂靜道何在。憂勤學

空饒。乃知減聞見。始遂情逍遙。文字徒營織。聲華諒疑驕。顧慙耕稼士。朴略氣韻調。善士有餘食。佳哇冬生苗。養人在養身。此旨清如韶。願貢高古言。敢望錫類招。



孟東野詩集卷第九

詠物

宇文秀才齋中海柳詠

玉縷青葦蕤。結爲芳樹姿。忽驚明月鈎。鈎出珊瑚枝。灼灼不死花。蒙蒙長生絲。飲栢一作況泛。一作仙味。詠蘭擬一作古詞。霜風清颼颼。與君長相思。

搖柳一作採柳

弱弱本易驚。看看勢難定。因風似醉舞。盡日不能正。時邀詠花女。笑輟春粧鏡。

曉鶴

曉鶴彈古舌。婆羅門叫音。應吹天下律。不使塵中尋。虛空夢皆斷。歆唏安能禁。如開孤月口。似說明星心。既非人間韻。枉作人間禽。不如相將去。碧落窠巢深。

和薔薇花歌

仙機札札一作織鳳凰。花開七十有二行。天霞落地攢紅光。風枝嫋嫋時一颺。飛散葩馥遶空王。忽驚錦浪洗新色。又似宮娃逞粧飾。終當一使移花一作根。還比蒲桃天上植。

邀人賞薔薇

蜀色庶可比。楚叢亦應無。醉紅不自力。狂豔如索扶。麗藥惜未掃。宛枝長更紆。何人是花佚。詩老強相呼。

和宣州錢判官使院廳前石楠樹

大朴既一剖。衆材爭萬殊。懿茲南海華。來與北壤俱。生長如自惜。雪霜無凋渝。籠籠抱靈秀。簇簇抽芳膚。寒日吐再艷。頰子流細珠。鴛鴦花數重。翡翠葉四鋪。雨洗新粧色。一枝如一姝。聳異敷庭際。傾妍來坐隅。散彩飾机按。餘輝盈盤盂。高意一作因自造化。常情逐榮枯。主公方寸中。陶植在須臾。養此奉君子。賞觀日爲娛。始覺石楠詠。價傾賦西都。棠頌庶可比。桂詞難以踰。因謝丘墟木。空採一作操落泥塗。時來開佳姿。道去臥枯株。爭芳無由緣。受氣如鬱紆。柚肝在郢匠。嘆息何踟蹰。

酬鄭毗躑躅詠

不似人手致。豈關地勢偏。孤光裊餘翠。獨影舞多妍。迸火燒閑地。紅星墮青天。忽驚物表物。嘉客爲留連。

品松

追悲謝靈運。不得殊常封。縱然孔與顏。亦莫及此松。此松天格高。聳異千萬重。抓拏拒古手。擘裂少室峯。擘裂風雨掣。抓拏指爪臚。道入難抱心。學生易墮蹤。時時數點仙。嫋嫋一線龍。霏微嵐浪際。遊戲顛興濃。品松徒高高。雌鳴一作語詎噶噶。賞異尙可貴。賞潛誰能容。名華非典實。翦棄徒織茸。刻削大雅文。所以不敢慵。

答李員外小榼味

一拳芙蓉水。傾玉何泠泠。仙清夙已高。詩味今更馨。試啜月入骨。再銜愁盡醒。荷君道古誠。使我善飛一作振翎。

井上枸杞架

深鎖銀泉甃。高葉架雲空。不與凡木並。自將仙蓋同。影踈千點月。聲細萬條風。迸子鄰溝外。飄香客位中。花盃承此飲。椿歲小無窮。

蜘蛛諷

萬類皆有性。各各稟天和。蠶身與汝身。汝身何太訛。蠶身不爲己。汝身不爲它。蠶絲爲衣裳。汝絲爲網羅。濟物幾無功。害物日已多。百蟲雖切恨。其將奈爾何。

蚊

五月中夜息。饑蚊爲營營。但將膏血求。豈覺性命輕。願己寧自愧。飲人以儉生。願爲天下幘。一使夜景清。

燭蛾

燈前雙舞蛾。獸生何太切。想爾飛來心。惡明不惡滅。天若百尺高。應去掩明月。

和錢侍郎甘露

玄天何以言。瑞露青松繁。忽見垂書跡。還驚涌澧源。春枝晨嫋嫋。香味曉翻翻。子禮忽來獻。臣心固易敦。清風惜不動。薄霧肯蒙昏。嘉晝色更晶。仁慈久乃存。一方難獨占。天下恐爭論。側聽飛中使。重榮華一作萃。

德門從公樂萬壽。餘慶及兒孫。

雜題

和令狐侍郎郭郎中題項羽廟

碧草凌古廟。清塵鎖秋牕。當時獨宰割。猛志誰能降。鼓氣雷作敵。劍光電爲雙。新悲徒自起。舊恨一作懷舊空浮江。

讀張碧集

天寶太白歿。六義已消歇。大哉國風本。喪而王澤竭。先生今復生。斯文信難缺。下筆證興亡。陳詞備風骨。高秋數奏琴。澄潭一輪月。誰作採詩官。忍之一作教不揮發。

聽琴

颯颯生雨收。翻翻一作桐橡葉鳴。月沉亂峯西。寥落三四星。前溪忽調琴。隔林寒琤琤。聞彈正弄聲。不敢枕上聽。迴燭微頭簪。漱泉立中庭。定步履一作展齒深。貌禪目冥冥。微風吹衣襟。亦認宮徵聲。學道三十年。未免憂死生。聞彈一夜中。會盡天地情。

聞夜啼贈劉正元

寄泣須寄黃河泉。此中怨聲流徹一作方到天。愁人獨有夜燈見。一紙卿書淚滴穿。

喜雨

朝見一片雲。暮成千里雨。淒清濕高枝。散漫沾荒土。

終南山下作

見此原野秀。始知造化偏。山村不假陰。流水自一作日雨田。家家梯碧峯。門門鎖青煙。因思蛻骨人。化作飛桂仙。

觀種樹

種樹皆待春。春至難久留。君看朝夕花。誰免別離愁。心意已零落。種之仍未休。胡爲好奇者。無事自買憂。

春後雨

昨夜一霎雨。天意蘇羣物。何物最先知。虛庭草爭出。

答友人贈炭

青山白屋有仁人。贈炭價重雙烏銀。驅却坐上千重寒。燒出爐中一片春。吹霞弄日光不定。暖得曲身成直身。

爛柯石

仙界一日內。人間千歲窮。雙碁未徧重。萬物皆爲空。樵客返歸路。斧柯爛從風。唯餘石橋在。猶自凌丹虹。

一作猶有  
靈丹虹

尋言上人

萬里莓苔地。不見驅馳蹤。唯開文字牕。時寫日月容。竹韻漫蕭屑。草花徒織一作茸。披霜入衆木。獨自識青松。

噴玉布

去塵咫尺步。山笑唯樂巖。天開紫石屏。泉縷一作明月簾。仙凝刻削跡。靈綻雲霞織。悅開若有待。瞥見終無厭。俗玩詎能近。道嬉方可淹。踏着不死機。欲歸多浮嫌。古醉今忽醒。今求古仍潛。古今相共失。語默兩難恬。贈君噴玉布。一濯高嶄嶄。

姑蔑城

勁越既成土。強吳亦爲墟。皇風一已被。茲邑信平居。撫俗觀舊跡。行春布新書。興亡意何在。綿歎空躊躇。

崢嶸嶺

疏鑿順高下。結構橫煙霞。坐嘯郡齋肅。玩奇石路斜。古樹浮綠氣。高門結朱華。始見崢嶸狀。仰止逾可嘉。

尋裴處士

涉水更登陸。所向皆清真。寒草不藏徑。靈峯知有人。悠哉鍊金客。獨與煙霞親。曾是欲輕舉。誰言空隱淪。遠心寄白月。一作華法迴青春。對此欽勝事。胡爲勞我身。

子慶詩

王家事已奇。孟氏慶無涯。獻子還生子。義之又有之。鳳兮且莫歎。鯉也會聞詩。小小豫章甲。纖纖玉樹姿。

人來唯仰乳。母抱未知慈。我欲揀其養。放麝者是誰。

憩淮上觀公法堂

動覺日月短。靜知時歲長。自悲道路人。暫宿空閑堂。孤燭讓清晝。紗巾斂輝光。高僧積素行。事外無剛強。我有巖下桂。願爲爐中香。不惜青翠姿。爲君一作師楊芬芳。淮水色不污。汴流徒渾黃。且將琉璃意。淨綴芙蓉章。明日還獨行。羈愁來舊腸。

江邑春霖奉贈陳侍御

江上花木凍。雨中零落春。應由放忠直。在此成漂淪。嘉豔皆損污。好音難殷勤。天涯多遠限。雪涕盈芳辰。坐哭青草上。臥吟幽水濱。興言念風俗。得意唯波鱗。枕蓆病流濕。簷楹若飛津。始知吳楚水。不及京洛塵。風浦蕩歸棹。泥陂陷征輪。兩途日無遂。相贈唯沾巾。

溧陽秋霽

晚雨曉猶在。蕭寥激前階。星星滿衰鬢。耿耿入秋懷。舊識半零落。前心驟相乖。飽泉亦恐醉。楊宦肅如齋。上客處華池。下寮宅枯崖。叩高占生物。齟齬回難諧。

列仙文

大霞霏晨暉。元氣無常形。玄轡飛霄外。八景乘高清。手把玉皇袂。攜我晨中生。玄挺自嘉會。金書拆華名。賢女密所妍。相期洛水湄。

右方諸青童君

歛駕空清虛。徘徊西華館。瓊輪暨晨抄。虎騎逐煙散。惠風振丹旌。明燭朗八煥。解襟墉房內。神鈴鳴瓊璨。栖景若林柯。九絃空中彈。遺我積世憂。釋此千載款。恰眄無極已。終夜復待旦。

清虛真人

駕我八景輿。歛然入玉清。龍羣拂霄上。虎旗攝朱兵。逍遙三絃際。萬流無暫停。哀此去留會。劫盡天地傾。當尋無中景。不死亦不生。體彼自然道。寂觀合大冥。南嶽挺直幹。玉英曜穎精。有任靡期事。無心自虛靈。嘉會絳河內。相與樂朱英。

金母飛空歌安度明

丹霞煥上清。八風鼓太和。迴我神霄輦。遂造嶺玉阿。咄嗟天地外。九圍皆我家。上採白日精。下飲黃月華。靈觀空無中。鵬路無間邪。願見魏賢安。濁氣傷汝和。勤研玄中思。道成更相過。

夏日謁智遠禪師

吾師當幾祖。說法云無空。禪心三界外。宴坐天地中。院靜鬼神去。身與草木同。因知護王國。滿鉢盛毒龍。斗藪塵埃衣。謁師見真宗。何必千萬劫。瞬息去樊籠。盛夏火爲日。一堂十月風。不得爲弟子。名姓掛儒宮。

訪嵩陽道士不遇

先生五兵遊。文焰藏金鼎。日下鶴過時。人間空落影。常言一粒藥。不墮生死境。何當列禦寇。去問仙人請。

聽藍溪僧爲元居士說維摩經

古樹少枝葉。眞僧亦相依。山木自由直。道人無是非。手持維摩偈。心向居士歸。空景忽開霽。雪花猶在衣。洗然水溪晝。寒物生光輝。

借車

借車載家具。家具少於車。借者莫彈指。貧窮何足嗟。百年徒校一作走。萬事盡隨花。

喜符郎詩有天縱

念符不由級。屹得文章階。白玉抽一毫。綠珉已難排。偷筆作文章。乞墨潛磨揩。海鯨始生尾。試擺蓬壺渦。幸當禁止之。勿使恣狂懷。自悲無子嗟。喜妬雙嗜嗜。

憑周況先輩於朝賢乞茶

道意勿乏味。心緒病無惊。蒙茗玉花盡。越甌荷葉空。錦水有鮮色。蜀山饒芳藂。雲根纔翦綠。印縫已霏紅。曾向貴人得。最將詩叟同。幸爲乞寄來。救此病一作劣躬。

上昭成閣不得於從姪僧悟空院嘆嗟

欲上千級一作尺。閣問天三四言。未盡數十登。心目風浪翻。手手把驚魄。脚踏墜魂。却流至舊手。傍掣猶欲奔。老病但自悲。古蠹木萬痕。老力安可誇。秋海萍一根。孤叟何所歸。晝眼如黃昏。常恐失好步。入彼市井門。結僧爲親情。策竹爲子孫。此誠徒切切。此意空存存。一寸地上語。高天何由聞。

魏博田興尚書聽嬾命不立非夫人詩

君子耽古禮。如饒魚吞鈎。昨聞敬嬾言。掣心東北流。□□田尚書。與禮相綢繆。善詞聞天下。一日一再周。

讀經

肝

垂老抱佛脚。教妻讀黃經。經黃名小品。一紙千明星。曾讀大般若。細感楞響聽。當時把齋中。方寸抱萬靈。忽復入長安。蹴踏日月寧。老方却歸來。收拾可丁丁。拂拭塵机梭。開函就孤亭。儒書難借索。僧籤饒芳馨。驛驛不開手。鏗鏗聞異鈴。得善如焚香。去惡如脫腥。安得顏子耳。曾未如此聽。聽之何有言。德教貴有形。何言中國外。有國如海萍。海萍國教異。天聲各泠泠。安排未定時。心火競熒熒。將如庶幾者。聲盡形元冥。

謝李翰再到

等閑拜日晚。夫妻猶相瘡。況是賢人冤。何必哭飛揚。昨夜夢得劍。爲君藏中腸。會將當風烹。血染布衣裳。勞君又扣門。詞句失尋常。我不忍出廳。血字濕上牆。血字耿不滅。我心懼惶惶。會有鏗鏘夫。見之月生光。生光非等閑。君其且安詳。

忽不貧喜盧仝書船歸洛

貧孟忽不貧。請問孟何如。盧仝歸洛船。崔嵬但載書。江湖清翻翻。淮潮碧徐徐。夜信爲朝信。朝信良卷舒。江淮君子水。相送仁有餘。我去官色衫。肩經入君廬。喃喃肩經郎。言語傾琪琚。琪琚鏗好詞。烏鵲躍庭除。書船平安歸。喜報鄉里閭。我願拾遺柴。巢經於空虛。下免塵土侵。上爲一作與雲霞居。日月更相鎖。道義分

明儲。不願空岩巖。但願實工夫。實空二理微。分別相起予。經書荒蕪多。爲君勉勉鋤。勉勉不敢專。傳之方在諸。





# 孟東野詩集卷第十

## 哀傷

### 弔國殤

徒言人最靈。白骨亂縱橫。如何當春死。不及羣草生。堯舜宰乾坤。器農不器兵。秦漢盜山岳。鑄殺不鑄耕。天地莫生金。生金人競爭。

### 弔比干墓

殷辛帝天下。馱爲天下尊。乾綱旣一斷。賢愚無一門。佞是福身本。忠是喪己源。餓虎不食子。人無骨肉恩。日影不入地。下埋冤死魂。有骨不爲土。應作直木根。今來過此鄉。下馬弔此墳。靜念君臣間。有道誰敢論。

### 弔元魯山十首

搏鷲有餘飽。魯山長飢空。豪人飫鮮肥。魯山飯蒿蓬。食名皆霸官。食力乃堯農。君子恥新態。魯山與古終。天璞本平一。人巧生異同。魯山不自剖。全璞竟沒躬。

自剖多是非。流濫將何歸。奔競一作損驅立詭節。凌侮爭怪輝。五帝坐銷鑠。萬類隨衰微。以茲見魯山。道蹇無

所依。

君子不自蹇。魯山蹇有因。苟含天地秀。皆是天地身。天地蹇旣甚。魯山道莫伸。天地氣不足。魯山食更貧。

始知補元化。竟須得賢人。

賢人多自羈。道理與俗乖。細功不敢言。遠韻方始諧。萬物飽爲飽。萬人懷爲懷。一聲苟失所。衆憾來相排。所以元魯山。饑衰難與偕。

遠階無近級。造次不可昇。賢人絜腸胃。寒日空澄凝。血誓竟訛繆。膏明易煎蒸。以之驅魯山。疎迹去莫乘。

言從魯山宦。盡化堯時心。豺虎恥狂噬。齒牙閑霜金。一作針。競來闢田土。相與耕嶽岑。當宵無關鎖。竟歲饒

歌吟。善教復一作履。天術。美詞非俗箴。精微自然事。視聽不可尋。因書魯山績。庶合簫韶音。

簫韶太平樂。魯山不虛作。千古若有知。百年幸如昨。誰能嗣教化。以此洗浮薄。君臣貴深遇。天地有靈橐。

力運旣艱難。德符方合莫。名位苟虛曠。聲明自銷鑠。禮法雖相救。貞濃易糟粕。哀哀元魯山。畢竟誰能度。

當今富教化。一作聖朝。禮嘉士。元后得賢相。冰心鏡衰古。霜議清遐障。幽埋盡泐洗。滯旅免流浪。唯餘魯山名。未獲

旌廉讓。二三貞苦士。刷視聳危望。髮秋青山夜。日斷丹闕亮。誘類幸從茲。嘉招固非妄。小生奏狂狷。感惕

增萬狀。

黃犢不知孝。魯山自駕車。非賢不可妻。魯山竟無家。供養恥它力。言詞豈纖瑕。將謠魯山德。曠海誰能涯。

遺嬰盡鷓乳。何況肉骨枝。心腸結苦誠。胷臆垂甘滋。事已出古表。誰言獨今奇。賢人母萬物。愷悌流前詩。

哭李觀

志士不得老。多爲直氣傷。阮公終日哭。壽命固難長。顏子旣沮謝。孔門無輝光。文星落奇曜。寶劍摧脩鋟。

常作金應石。忽爲宮別商。爲爾弔琴瑟。斷絃難再張。偏轂不可轉。隻翼不可翔。清塵無吹噓。委地難飛揚。比義古所重。此風今已亡。自聞喪元賓。一日入九狂。沉痛此文夫。驚呼彼穹蒼。我有出俗韻。勞君疾惡腸。知音既已矣。微言一作善誰能彰。旅葬無高墳。栽一作孤松不成行。哀歌動寒日。贈淚沾晨霜。神理本窅窅。一作冥冥今來更茫茫。何以蕩悲懷。萬事付一觴。

李少府廳弔李元賓遺字

元賓題少府廳云宿從叔宅有感有其義而無其辭

零落三四字。忽成千萬年。那知冥寞客。不有補亡篇。斜月弔空壁。旅人難獨眠。一生能幾時。百慮來相煎。戚戚故交淚。幽幽長夜泉。已矣難重言。一言一潸然。

悼吳興湯衡評事

君生一作在雪水清。君歿雪水渾。空令骨肉情。哭得白日昏。大夜不復曉。古松長閉門。琴絃綠水絕。詩句青山存。昔爲芳春顏。今爲荒草根。獨問冥冥理。先儒未曾言。

哀孟雲卿嵩陽荒居

戚戚抱幽獨。晏晏沉荒居。不聞新歡笑。但覩舊詩書。藝蘖意彌苦。耕山食無餘。定交昔何在。至戚今或疎。薄俗易銷歇。淳風難久舒。秋蕪上空堂。寒槿落枯渠。薤草恐傷蕙。攝衣自理鋤。殘芳亦可飢。遺秀誰忍除。徘徊未能去。爲爾涕漣如。

哭盧貞國

一別難與期。存亡易寒燠。下馬入君門。聲悲不成哭。自能富才藝。當異深榮祿。皇天負我賢。遺恨至兩目。平生嘆無子。家事親相囑。

傷舊遊

去春會處今春歸。花數不減人數稀。朝笑片時暮成泣。東風一向還西輝。

弔房十五次卿少府

日高方得起。獨賞些些春。可惜宛轉鶯。好音與它人。昔年此氣味。還走曲江濱。逢着韓退之。結交方殷勤。蜀客骨目高。聰辯劍戟新。如何昨日歡。今日見無因。英奇一謝世。視聽一爲塵。誰言老淚短。淚短沾衣巾。一作足

沾巾

逢江南故書上人會中鄭方回

上人往年手札五十篇相贈云以爲它日之念

相逢失意中。萬感因語至。追思東林日。掩抑北印淚。筐篋有遺文。江山舊清氣。塵生逍遙注。一作篇墨故飛動字。荒毀碧澗居。虛無青松位。珠沉百泉暗。月死羣象闕。永謝平生言。知音豈容易。

哭秘書包大監

哲人臥病日。賤子泣玉年。常恐寶鏡破。明月難再圓。文字未改素。聲容忽歸玄。始知知音稀。千載一絕絃。舊館有遺琴。清風那復傳。

悼幼子

一閉黃蒿門。不聞白日事。生氣散成風。枯骸化爲地。負我十年恩。欠爾千行淚。洒之北原上。不待秋風至。

### 悼亡

山頭明月夜。增輝不照重泉下。泉下雙龍無再期。金蠶玉鷲空銷化。朝雲暮雨成古墟。蕭蕭野竹風吹亞。

### 弔李元賓墳

曉上荒涼原。弔彼冥寞魂。眼咽此時淚。耳悽在日言。寂寂千萬年。墳鎖孤松根。

### 覽崔爽遺文因抒幽懷

崔君歿於南方

墮淚數首文。悲結千里墳。蒼旻且留我。白日空遺君。仙鶴未巢月。衰鳳先墜雲。清風獨起時。舊語如再聞。瑤草罷葳蕤。桂花休氛氲。萬物與我心。相感吳江濱。

### 峽哀十首

昔多相與笑。今誰相與哀。峽哀哭幽魂。

一作夢

噉噉風吹來。墮魄抱空月。出沒難自裁。齧粉一閃間。春濤百

丈一作尺

雷。峽水聲不平。碧沓牽清洄。沙稜箭箭

一作湍湍

急。波齒斷斷開。呀彼無底吮。待此不測災。谷號相噴

激。石怒爭旋迴。古罪有復鄉。今繲多爲能。字孤徒髣髴。銜雪猶驚猜。薄俗少直腸。交結須橫財。黃金買相弔。幽泣無餘灌。我有古心意。爲君空摧頽。

上天下天水。出地入地舟。石劍相劈斫。石波怒蛟虬。花木疊宿春。風飈凝古秋。幽怪窟穴語。飛聞胙響流。沉哀日已深。銜訴將何求。

三峽一線天。三峽萬繩泉。上仄碎日月。一掣狂漪漣。破魄一兩點。凝幽數百年。峽暉不停午。峽險多饑涎。樹根鎖枯棺。孤骨裊裊懸。樹枝哭霜棲。哀韻杳杳鮮。逐客零落腸。到此湯火煎。性命如紡績。道路隨索綠。奠淚一作醉。弔波靈。波靈將閃然。

峽亂鳴清磬。峽虬鳴清聲。產石爲鮮鱗。噴爲腥雨涎。吹作黑井身。怪光閃衆異。餓劍唯待人。老腸未曾飽。古齒

嶄崑噴嚼齒。三峽泉。三峽聲斷斷。

峽螭一作蛟。老解語。百丈潭底聞。毒波爲計校。飲血養子孫。既非臯陶吏。空食沉獄一作玉。魂潛怪何幽幽。魄說

徒云云。峽聽哀哭泉。峽弔鰥寡猿。峽聲非人聲。劍水相劈翻。斯誰士諸謝。奏此沉苦言。

讒人峽虬心。渴罪呀然潄。所食無直腸。所語饒蟲音。石齒嚼百泉。石風號千琴。幽哀莫能遠。分雪何由尋。

月魄一作魂。高卓卓。峽窟一作窟。清口沉。銜訴何時明。抱痛已不禁。犀飛空波濤。裂石千嶽岑。

峽稜剗日月。日月多摧輝。物皆斜仄生。鳥亦斜仄飛。潛石齒相鎖。沉魂招莫歸。恍惚清泉甲。班爛碧石衣。餓蕪潺湲號。涎似泓汰肥。峽春不可遊。腥草生微微。

峽景滑易墮。峽花怪非春。紅光根潛涎。碧雨飛沃津。巴谷蛟螭心。巴鄉魍魎親。噉生不問賢。至死獨養身。腥語信者誰。拗歌歡非真。仄田無異稼。毒水多瘳鱗。異類不可友。峽哀哀難伸。

峽水劍戟孿。峽舟霹靂翔。因依虺蜴手。起坐風雨忙。峽旅多竄官。峽氓多非良。滑心不可求。滑習積已長。漠漠涎霧起。斷斷涎水光。渴賢如之何。忽在水一作此中央。

梟鷂作人語。蛟虬吸山波。能於白日間。詔欲晴風和。駭智蹶衆命。蘊腥布深蘿。齒泉無底貧。鋸涎在處多。仄樹鳥不巢。踔猿相過。峽哀不可聽。峽怨其奈何。

杏殤九首并序

杏殤花乳也。霜翦而落。因悲昔嬰。故作是詩。

凍手莫弄珠。弄珠珠易飛。驚霜莫翦春。翦春無光輝。零落小花孔。爛班昔嬰衣。拾之不盈把。日暮空悲歸。地上空拾星。枝上不見花。哀哀孤老人。戚戚無子家。豈若沒水鳧。不如拾巢雅。浪擊破便飛。風鷓巖相誇。芳嬰不復生。向物空悲嗟。

應是一線淚。入此春木心。枝枝不成花。片片落翦金。春壽何可長。霜哀亦已深。常時洗芳泉。此日洗淚襟。兒生月不明。兒死月始光。兒月兩相奪。兒命果不長。如何此英英。亦爲弔蒼蒼。甘爲墮地塵。不爲末世一作木芳。

踏地恐土痛。損彼芳樹根。此誠天不知。翦棄我子孫。垂枝有千落。芳命無一存。誰謂生人家。春色不入門。冽冽霜殺春。枝枝疑織刀。木心旣零落。山竅空呼號。班班落地英。點點如明膏。始知天地間。萬物皆不牢。哭此不成春。淚痕三四班。失芳蝶旣狂。失子老亦孱。且一作無生生力。自一作有死死顏。靈鳳不銜訴。誰爲扣天關。

此兒自見災。花發多不諧。窮老收碎心。永夜抱破懷。聲死更何言。意死不必喈。病叟無子孫。獨立猶束柴。

霜似敗紅芳。翦啄十數雙。參差呻細風。噉啣沸。一作戲。淺江泣凝疑。一作疑。不可消。一作諳。恨壯難自降。空遺舊日影。

怨彼一作此。小書牕。

弔江南老家人春梅

念爾筋力盡。違我衣食恩。柰何麤獷兒。生鞭見死痕。舊使常以禮。新怨一作冤。將誰吞。胡為乎泥中。一作上天。消叻教義源。

哭李丹員外并寄杜中丞

生死方知交態存。忍將齟齬報幽魂。十年同在平原客。更遣何人哭寢門。

哭劉言史

詩人業孤峭。餓死良已多。相悲與相笑。累累其奈何。精異劉言史。詩腸傾珠河。取次抱置之。一作取火為拋擲。飛過東溟波。可惜大國謠。飄為四夷歌。常於衆中會。顏色兩切磋。今日果成死。葬襄一作喪。之洛河。洛岸遠相弔。

酒淚雙滂沱。

弔盧殷十首

詩人多清峭。餓死抱空山。白雲既無主。飛出意等閑。久病牀席尸。護喪童僕孱。故書窮鼠噉。狼籍一室間。君歸新鬼鄉。我面古玉一作土。顏。羞見入地時。無人叫追攀。百泉空相弔。日久一作夕。哀潺潺。唧唧復唧唧。千古一月色。新新復新新。千古一花春。邙風噫孟郊。嵩秋葬盧殷。北邙前後客。相弔為埃塵。

北邙棘針草。淚根生苦辛。烟火不自煖。筋力早已貧。幽薦一盃泣。瀉之清洛濱。添爲斷腸聲。愁殺長別人。棘針風相號。破碎諸苦哀。苦哀不可聞。掩耳亦入來。哭絃多煎聲。恨涕有餘摧。噫貧氣已焚。噫死心更灰。夢世浮閃閃。淚波深洄洄。薤歌一以去。蒿閉不復開。

登封草木深。登封道路微。日月不與光。莓苔空生衣。可憐無子翁。虬蟬緣病肌。攀臥歲時長。漣漣但幽噫。幽噫虎豹聞。此外相訪稀。至親唯有詩。抱心死有歸。河南韓先生。後君作因依。磨一片嵌巖。書千古光輝。賢人無計校。生苦死徒誇。它名潤子孫。君名潤泥沙。可惜千首文。閃如一朝花。零落難苦言。一作久留起坐空驚嗟。

耳聞陋巷生。眼見魯山君。餓死始有名。餓名高氛氲。鬻叟老壯氣。感之爲憂雲。所憂唯一泣。古今相紛紛。平生與君說。逮此俱云云。

初識漆鬢髮。爭爲新文章。夜踏明月橋。店飲吾曹床。醉啜二盃釀。名郁一縣香。寺中摘梅花。園裏翦浮芳。高嗜綠蔬一作雲。羹意輕肥膩。羊吟哦無滓韻。言語多占腸。白首忽然至。盛年如偷將。清濁俱莫追。何須罵滄浪。

前賢多哭酒。哭酒免哭心。後賢試銜之。哀至無不深。少年哭酒時。白髮亦以侵。老年哭酒時。聲韻隨生沉。寄言哭酒賓。勿作登封音。登封徒放聲。天地竟難尋。同人少相哭。異類多相號。始知禽獸癡。却至天然高。非子病無淚。非父念莫勞。如何裁親疎。用禮如用刀。

孤喪鮮匍匐。閉哀抱鬱陶。煩他手中葬。誠信焉能褒。嗟嗟無子翁。死棄如脫毛。聖人哭賢人。骨化氣為星。文章飛上天。列宿增晶熒。前古文可數。今人文亦靈。高名稱謫仙。昇降曾莫停。有文死更香。無文生亦腥。為君鑿好辭。永傳作謚寧。

聯句

有所思聯句

相思繞我心。日夕千萬重。年光坐晚晚。春淚銷顏容。臺鏡晦舊暉。庭草滋新茸。望夫山上石。別劍水一作池。中龍愈。

遣興聯句

我心隨月光。寫君庭中央。月光有時晦。我心安所忘。常恐金石契。斷為相思腸。平生無百歲。歧路有四方。愈。四方各異俗。適意非所將。鴛蹄顧挫抹。逸翮遺稻梁。時危抱獨沉。道泰懷同翔。獨居久寂默。相顧聊慨慷。慨慷丈夫志。可以耀鋒鋦。遽甯知卷舒。孔顏識行藏。朗鑒諒不遠。佩蘭永芬芳。苟無夫子聽。誰使知音揚。

贈劍客李園聯句

天地有靈術。得之者唯君。築爐地區外。積火燒氛氲。照海鑠幽怪。滿空歎異氛。山磨電弈弈。水淬龍螭螭。太一裝以寶。列仙篆其文。可用懾百神。豈唯壯三軍。有時幽匣吟。忽似深潭聞。風胡久

已死。此劍將誰分。愈。行當獻天子。然後致殊勳。郊。豈如豐城下。空有斗間雲。愈。讚

讚維摩詰

貌是古印。言是空音。在酒不飲。在色不淫。非獨僧禮。亦使儒欽。感此補亡。書謝懸金。

書

上常州盧使君書

道德仁義。天地之常也。將有人主張之乎。將無人主張之乎。曰。賢人君子有其位。言之可以周天下而行也。無其位。則周身言之可也。周天下言之不可也。仲尼當時無其位。言之亦不可。周天下而行也。及至著書。載其言。則周萬古而行也。豈唯周天下而已哉。仲尼非獨載其言。周萬古而行也。前古聖賢得仲尼之道。則其言皆載之。周萬古而行。閣下道德仁義之言。已聞周天下誦之久矣。其後著書。君子亦當載矣。周萬古而行也。幸甚幸甚。道德仁義之言。天地至公之道也。君子著書。期不朽。亦天地至公之道。夫何讓哉。是故不以道德仁義事其君者。以盜賊事其君也。不以道德仁義之衣食養其親者。是盜賊養其親也。閣下既以道德仁義事其君。聞之天下久矣。小子顯求閣下道德仁義之衣食。以爲養也。謂之中庸之道。謂之中庸。則敢求也。謂之特達。則不敢求也。小子嘗衣食宣武軍司馬陸大夫。道德仁義之矣。陸公既沒。又嘗衣食此郡。前守吏部侍郎韋公。道德仁義之矣。韋公既去。衣食亦去。道德仁義顯。其主張

謹載是書。及舊文。又有子遇之書。同乎緘獻。輕重可否。傾一言陳謝。誠異於異日。不宣。郊再拜。

又上養生書

天之與人一其道也。天地不棄於人。人自棄於天。天可棄於人乎。曰不可。人自棄也已。曰人皆棄之乎。曰賢人君子不棄也。凡人棄之可。天有殺物之心。而無棄物之心。天有棄物之心。則萬物莫能生矣。是故君子之於萬物皆不棄也。而況於身乎。棄其身。是棄其後也。棄其後。是棄其先也。故曰君子之道豈易哉。敢不法天而行身乎。所以君子養其身。養其公也。小人養其身。養其私也。身以及家。家以及國。國以及天下。以公道養天下。則天下肥也。以私道養天下。則天下削也。養身之道。豈容易哉。養其公者。天道養也。養其私者。人情養也。以天道養其人。則合天矣。以人情養其人。則不合天矣。以人情養其人。自棄矣。天道質也。人情文也。天道靜也。人情動也。質者生之侈也。靜者生之得也。動者生之棄也。文不以質勝之。則文爲棄矣。動不以靜制之。則動爲棄矣。天者。水之謂也。人者。魚之謂也。魚棄水。則螻蟻得之矣。人棄天。則疾病得之矣。魚可安於水。而不可翫於水。其失也。在乎恣波浪而不迴也。人可安於天。而不可翫於天。其失也。在乎恣嗜慾而不迴也。所謂安於天者。法天之味而食之。食不違於四時也。法天之聽而聽之。聽不違於五節也。法天之明而視之。視不違於五色也。食與視聽苟違於天。則疾病得之矣。故曰君子法天而行身也。小人翫天而棄身也。書之座右。嵇康猶有所棄。秦之醫和。晉之杜蒯。其亦不書於右。則何以爲君子之座哉。良藥苦口也。苦口獲罪於人。苟或有矣。仁義之獲罪於天。未之有也。恩養下將。遠辭違書。寫至誠之言。不勝惶悚之甚。不宣。郊再拜。

東野詩。世傳汴吳鏤本五卷。一百二十四篇。周安惠本十卷。三百三十一篇。別本五卷。三百四十篇。蜀人蹇濬用退之贈郊句。纂成池集二卷。一百八十篇。自餘不爲編秩。雜錄之。家家自異。今總括遺逸。摘去重複。若體制不類者。得五百一十一篇。釐別樂府。感興。詠懷。游適。居處。行役。紀贈。懷寄。酬答。送別。詠物。雜題。哀傷。聯句。十四種。又以贊書二系于後。合十卷。嗣有所得。當次第益諸。十聯句。見昌黎集。章章於時。此不者云。集賢校理常山宋敏求題。

對

001247



國立中央圖書館  
收藏

中華民國二十七年七月初版

(81566)

本國學基  
叢書  
孟東野詩集 一冊

每冊實價國幣貳角伍分

外埠酌加運費匯費

撰者 孟 郊

發行人 王 雲 五  
長沙南正路

印刷所 商 務 印 書 館  
長沙南正路

發行所 各 埠 商 務 印 書 館

國家圖書館



000025151



4416

籍